

摘藻堂四庫全書薈要

史部

欽定四庫全書叢要

史部

明史卷二百七十二

詳校官兵部主事臣雷純



欽定四庫全書薈要卷六千八百六十五

史部

明史卷二百七十二

大學士張廷玉等奉 勅修

傳第一百六十

金國鳳

楊振
楊國柱

曹變蛟

朱文德
朱輔明

劉肇基

乙邦才
馬應魁

莊子固

金國鳳宣府人崇禎中以副總兵守松山十二年二月
大清以重兵來攻環城發礮臺堞俱摧城中人負扉以

行國鳳間出兵突擊輒敗還乃以木石甃補城壞處
大清兵屢登屢却遂分兵攻塔山連山令銳卒分道穴
城國鳳多方拒守終不下閱四旬圍解帝大喜立擢署
都督僉事為寧遠團練總兵官再論功署都督同知廕
錦衣衛千戶是年十月

大清兵復攻寧遠國鳳憤將士恇怯率親丁數十人出
據北山岡鏖戰移時矢盡力竭與二子俱死帝聞痛悼
贈特進榮祿大夫左都督賜祭塋有司建祠增世職三

級總督洪承疇上言國鳳素懷忠勇前守松山兵不滿
三千乃能力抗強敵卒保孤城非其才力優也以事權
專號令一而人心肅也迨擢任大將兵近萬人反致隕
命非其才力短也由行伍紛紜號令難施而人心不一
也乞自今設連營節制之法凡遇警守城及統兵出戰
惟總兵官令是聽庶軍心齊肅戰守有資所係於封疆
甚大帝即允行之及國鳳父子柩歸帝念其忠命所過
有司給以舟車且加二祭其妻張氏援劉綎例乞加宮

保部議格不行而請於世職增級外再廕本衛試百戶
世襲以勸忠臣帝可之當松山被圍巡撫方一藻議遣
兵救援諸將莫敢應獨副將楊振請行至呂洪山遇伏
一軍盡覆振被執今往松山說降未至里許踞地南向
坐語從官李祿曰為我告城中人堅守援軍即日至矣
祿詣城下致振語城中守益堅振祿皆被殺事聞命優
卹振義州衛人世為本衛指揮使天啟二年河東失守
歸路梗其母自縊振隨父及弟夜行晝伏渡鴨綠江入

皮島毛文龍知其父子才並署軍職文龍死振歸奏崇
煥為寧遠千總崇禎二年從入衛救開平有功進都司
僉書郵馬山之戰以遊擊進叅將久之擢副總兵監視
中官高起潛招致之不往中以他事落職用一藻薦復
官及是死難振從父國柱崇禎九年為宣府總兵官十
一年冬入衛畿輔從總督盧象昇戰賈莊象昇敗歿國
柱當坐罪大學士劉宇亮侍郎孫傳庭皆言其身入重
圍非臨敵退却者比乃充為事官戴罪圖功十四年祖

大壽被困錦州總督洪承疇率八大將往救國柱先至
松山陷伏中

大清兵四面呼降國柱太息語其下曰此吾兄子昔年
殉難處也吾獨為降將軍乎突圍中矢墮馬卒事聞贈
卹如制國柱二子俱妖妻何氏以所遺甲冑弓矢及戰
馬五十三匹獻諸朝帝深嘉歎命授一品夫人有司月
給米石餼之終身

曹變蛟文詔從子也幼從文詔積軍功至遊擊崇禎四

年從復河曲明年連破賊紅軍友等於張麻村隴安水
落城唐毛山又破劉道江等於銅山橋勇冠諸軍以御
史吳姓薦進參將文詔移山西變蛟從戰輒勝及文詔
改鎮大同山西巡撫許鼎臣言晉賊紫金梁雖死老回
回過天星大天王蝎子塊闖塌天諸渠未滅變蛟驍勇
絕人麾下健兒千百才乃文詔亞乞留之晉中從之七
年羣賊入湖廣命變蛟南征文詔困於大同又命北援
七月遇

大清兵廣武有戰功其冬文詔失事論戍變蛟亦以疾
歸明年文詔起討陝西賊變蛟以故官從大捷金嶺川
鏖真寧之湫頭鎮皆為軍鋒文詔既戰歿變蛟收潰卒
復成一軍總督洪承疇薦為副總兵置麾下與高傑破
賊關山鎮逐北三十餘里又與副將尤翟文遊擊孫守
法追闖王高迎祥與戰鳳翔官亭斬首七百餘級又與
總兵左光先敗迎祥乾州迎祥中箭走斬首三百五十
餘級已而迎祥自華陰南原絕大嶺夜出朱陽關光先

戰不利賴變蛟陷陣乃獲全九年破閩將澄城偕光先等追至靖虜衛轉戰安定會寧抵靜寧固寧賊屢挫其秋追混天星等敗之蒲城賊西走平涼鞏昌復擊破之十年二月巡撫孫傳廷部卒許忠叛勾賊混十萬謀犯西安變城方西追過天星聞亂急還賊遂遁傳庭已誅迎祥其黨閩將混天星過天星踞洮岷階文深谷間承疇遣變蛟光先及祖大弼孫顯祖合擊四月望入山遇賊郭家壩大雨諸將力戰賊死傷無算食盡引還九月

階州陷與光先並停俸俄擢都督僉事為臨洮總兵官
當是時承疇傳庭共天滅賊傳庭戰於東承疇戰於西
東賊幾盡賊在西者復由階成出西和禮縣光先顯祖
皆無功獨變蛟降小紅狼餘賊竄走徽州兩當成鳳間
不敢大逞十月賊澗蜀中虛陷寧羌州分三道連陷三
十餘州縣承疇率變蛟等由沔縣歷寧羌過七盤朝天
二關山高道狹士馬饑疲歲暮抵廣元賊已走還秦變
蛟等回軍邀擊斬首五百餘級時兵部尚書楊嗣昌劾

四正六隅之說限三月平賊十一年四月以減賊踰期

普議降罰變蛟光先並錫五官戴罪辦賊賊之再入秦

也其渠魁號六隊者與大天王混天王爭管王四部連

營東犯混天星過天星二部仍伏階文獨闖將李自成

以三月自洮州出番地承疇今變蛟偕賀人龍追之連

戰斬首六千七百有奇番地乏食賊多死亡變蛟轉戰

千里身不解甲者二十七晝夜餘賊潰入塞大弼駐洮

州扼賊不力乃走入岷州及西和禮縣山中變蛟還勦

賊伏匿不敢出惟六隊勢猶張六月光先自固原進兵賊已奔隴州清水光先追至秦州六隊及爭管王復走咸縣階州為變蛟所扼其別部號三隊及仁義王混天王降於光先而自成六隊及其黨祁總管避秦兵復謀犯蜀副將馬科賀人龍拒之將還走階文及西鄉憚變蛟乃走漢中又為光先所扼六隊祁總管皆降惟自成東遁承疇令變蛟窮追而設三覆於潼關之南原變蛟追及大呼斫賊伏盡起賊屍相枕藉村民用大棒擊逃

者自成妻女俱失從七騎遁去餘皆降是時曹兵最强
各鎮依之以為固錄關中平賊功進變蛟左都督十一
月京師戒嚴召承疇入衛變蛟及光先從之明年二月
抵近畿帝遣使迎勞將士各有賜未幾戰渾河無功再
戰太平砦北小有斬獲及解嚴留屯遵化麾下皆秦卒
思歸多逃亡者追斬之乃定時張獻忠羅汝才既降復
叛陝西再用兵總督鄭崇儉乞令變蛟兵西還帝不許
尋用為東協總兵官十二年正月錦州告急從總督承

疇出關駐寧遠七月與援勦總兵左光先山海總兵馬科寧遠總兵吳三桂遼東總兵劉肇基遇

大清兵于黃土臺及松山杏山互有殺傷

大清兵退屯義州承疇議遣變蛟光先科之兵入關養銳留三桂肇基於松杏間佯示進兵狀又請解肇基任代以王廷臣遣光先西歸代以白廣恩部議咸從之而請調旁近邊軍合關內外見卒十五萬人備戰守用承疇言師行糧從必芻糧足支一歲然後可議益兵帝然

之敕所司速措給徵宣府總兵楊國柱大同總兵王樸
密雲總兵唐通各揀精兵赴援以十四年三月偕變蛟
科廣恩先後出關合三桂廷臣凡八大將兵十三萬馬
四萬並駐寧遠承疇念祖大壽被圍久乃議急救錦州
七月二十八日諸軍次松山營西北岡數戰圍不解八
月國柱戰歿以山西總兵李輔明代之承疇命變蛟營
松山之北乳峰山之西兩山間列七營環以長濠俄聞我
大宗文皇帝親臨督陣諸將大懼及出戰連敗餉道又絕

樸先夜遁通科三桂廣恩輔明相繼走自杏山迤南沿海東至塔山為

大清兵邀擊溺海死者無算變蛟廷臣聞敗馳至松山與承疇固守三桂樸奔據杏山越數日欲走還寧遠至高橋遇伏大敗僅以身免先後喪士卒凡五萬三千七百餘人自是錦州圍益急而松山亦被圍應援俱絕矣九月承疇變蛟等盡出城中馬步兵欲突圍出敗還守半年至明年二月副將夏成德為內應松山遂破承疇

變蛟廷臣及巡撫邱民仰故總兵祖大樂兵備道張斗
姚恭王之楨副將江翥饒勲朱文德參將以下百餘人
皆被執見殺獨承疇與大樂獲免文德義州衛人後家
錦州崇禎時積功至松山副將忤監視中官高起潛為
所中斥罷十一年起故官及城被圍領前鋒拒守甚力
城破竟死三月大壽遂以錦州降杏山塔山連失京師
大震詔賜諸臣祭塋有司建祠變蛟妻高氏以贈廕請
乃贈榮祿大夫太子少保世廕錦衣指揮僉事法司會

鞠王樸罪御史郝晉言六鎮罪同皆宜死三桂實遼左
主將不戰而逃奈何反加提督兵部尚書陳新甲覆議
請獨斬僕勒科軍令狀再失機即斬決三桂失城應斬
念守寧遠功與輔明廣恩通皆貶秩充為事官輔明遼
東人累官副總兵崇禎八年從祖寬擊賊連蹙之嵩縣
汝州碓山明年追破賊于滁州叙功加都督僉事十二
年擢山西總兵官被劾罷明年從承疇出關使代國柱
竟敗十六年為援勦總兵是冬

大清兵薄寧遠輔明馳援軍敗猶力戰歿於陣事聞贈

特進榮祿大夫左都督世廕錦衣副千戶賜祭塋列壇

前屯祀之樸榆林衛人父威官左都督九佩將印為提

鎮者五十年兄世欽里居殉難見尤世威傳中樸由父

廕屢遷京營副將崇禎六年賊躡畿南命樸與倪寵為

總兵官將京軍六千監以中官楊應朝盧九德屢有斬

獲功進右都督明年代曹文詔鎮大同進左都督九年

秋都城被兵詔樸入衛賚蟒衣彩幣竟無功十一年加

太子太保是冬從總督盧象昇入衛方戰樂城東鹿間
或言大同有警即引兵歸及是救錦州以首逃下詔獄
十五年五月伏誅科起偏裨至大帥戰功亞變蛟與三
桂同守寧遠有功十六年春督兵入衛賜宴武英殿命
從大學士吳姓南征不果行明年三月從李建泰西征
李自成兵至科遂降封懷仁伯廣恩初從混天猴為盜
既降屢立戰功松山敗還代馬科鎮山海關是年十一
月京師戒嚴廣恩入衛賚銀幣羊酒餼戰龍王口稍有

斬獲以捷聞帝始惡廣恩觀望降旨譙責而冀其後效

特命叙功明年四月合八鎮兵戰螺山悉潰敗總督趙
光并請帝召之入用為武經畧廣恩以帝頻戮大將已
又多過懼不敢至假索餉名頓真定大學士吳姓將南
征密請帝嚴旨逮治而已力救率之勦寇廣恩感甚無
何帝遣中官齎二萬金犒其軍且諭以溫旨廣恩遂驕
不為姓用大掠臨洺闕徑歸陝西帝不得已命隸督師
孫傳庭辦賊十月邠縣師覆加恩廣盪寇將軍俾緣道

收潰卒以保潼關未幾潼關亦破廣恩西奔固原賊將
追躡及之即開門降自成大喜握手共飲封桃源伯通
口辨無勇畧既敗歸仍鎮密雲其年冬奉詔入衛命守
禦三河平谷

大清兵下山東通尾之而南抵青州迄不敢一戰明年
復尾而北戰螺山敗績已命從姓南征姓未行而斥乃
令通轄薊鎮西協五月汰密雲總兵官命兼轄中協四
路尋用孔希貴於西協而命通專轄中協十月關外有

警命率師赴援以銀牌二百為賞功用事定復移鎮西
協帝顧通厚有蟒衣玉帶之賜召見稱卿而不名錫之
宴獎勞備至明年賊逼宣府命移守居庸封定西伯無
何賊犯關即偕中官杜之秩迎降京師遂陷光先梟將
也與賊角陝西功最多自遼左遣還廢不用後聞廣恩
從賊亦詣賊降又有陳永福者守開封射李自成中目
及自成陷山西令廣恩諭之降永福懼誅意猶豫自成
折箭以示信乃降封為文水伯後自成敗還山西永福

為守太原殺晉府宗室殆盡

劉肇基字鼎維遼東人嗣世職指揮僉事遷都司僉書

隸山海總兵官尤世威麾下崇禎七年從世威援宣府

又從勦中原賊進遊擊戍雄南蘭草川明年遇賊戰敗

傷臂未幾世威罷肇基及遊擊羅伍分將其兵與祖寬

大破賊汝州斬首千六百有奇後從寬數有功而其部

下皆邊軍久戍思歸與寬軍譟而走總理盧象昇乃遣

之入秦其秋畿輔有警始還山海竟坐前罪解職令從

征自效俄以固守永平功復職屢遷遼東副總兵十二年冬薊遼總督洪承疇請用為署總兵官分練寧遠諸營卒兵部尚書傅宗龍稍持之帝怒下宗龍獄擢肇基都督僉事任之明年三月錦州有警承疇命吳三桂偕肇基赴松山為聲援三桂困松杏間肇基救出之喪士卒千人七月與曹變蛟等戰黃土臺及松山杏山九月復戰杏山肇基軍稍却承疇甄別諸將解肇基職代以王廷臣十七年春加都督同知提督南京大教場及福

王立史可法督師淮揚肇基請從征自效屢加左都督
太子太保可法議分布諸將奏薦李成棟賀大成王之
綱李本身胡茂楨為總兵官成棟鎮徐州大成揚州之
綱開封本身茂楨隸高傑麾下為前鋒而令肇基駐高
家集李棲鳳駐睢寧以防河棲鳳本甘肅總兵以地失
留淮揚間也閩標前鋒則用張天祿駐瓜洲十一月肇
基棲鳳以可法命謀取宿遷初八日渡河復其城越數日
大清兵圍邳州軍城北肇基軍城南相持半月

大清兵引去

順治二年三月

大清兵抵揚州可法邀諸將赴援獨肇基自白洋河趨赴過高郵不見妻子既入城請乘

大清兵未集背城一戰可法持重肇基乃分守北門發礮傷圍者已而城破率所部四百人巷戰格殺數百人後騎來並衆力不支一軍皆沒副將乙邦才馬應魁莊子固等皆同死乙邦才青州人崇禎中以隊長擊賊於

河南江北間大將黃得功與賊戰霍山單騎逐賊陷淖
中賊圍而射之馬斃得功徒步鬪天將暮僅餘二矢邦
才大呼衝賊走得功乃得出邦才授以已馬分矢與之
且走且射殲追騎十餘人始得及其軍得功自是知邦
才時有張衡者亦以騎敢名賊圍六安急總督馬士英
救之甫至斥其左右副將而號於軍中曰孰為乙邦才
張衡者兩人入謁即牒補副將以其兵授之曰為我入
六安取知州狀來報兩人出即簡精騎二百夜衝賊陣

而入遠城大呼曰大軍至矣固守勿懈城中人喜守益堅兩人促知州署狀復奪圍出不損一騎時潁壽六安霍山諸州縣數被寇邦才大小十餘戰咸有功及可法鎮揚州攜之行至是戰敗自刎死馬應魁字守御貴池人初為小將率家丁五十人巡村落間猝遇賊衆懼欲奔應魁大聲曰勿怖死死命也連發二矢殪二賊賊即退可法因拔為副總兵俾領旗鼓每戰披白甲大書盡忠報國四字於背至是巷戰死莊子固字憲伯遼東人

年十三殺人亡命後從軍有功積官至參將嘗從山西
總兵許定國救開封軍半道謀歸定國獲罪子固輯餘
衆得免議後可法出鎮用為副總兵俾與屯於徐州
歸德間子固募壯士七百人以赤心報國為號聞
揚州被圍率衆馳救三日而至城將破欲擁可法出
城遇

大清兵格鬪死他若副將樓挺江雲龍李豫參將陶國
祚許謹馮國用陳光玉李隆徐純仁遊擊李大忠孫開

忠都司姚懷仁解學曾等十餘人皆以巷戰死

贊曰金國鳳之善守曹變蛟之力戰均無媿良將材然
肇基等効命偏隅孤忠彌厲而運移事易難于建功而
易于挫敗遂至謀勇無絀以身殉之蓋天命有歸莫之
為而為者矣

明史卷二百七十二

欽定四庫全書

明史卷二百七十二考證

金國鳳傳國鳳憤將士惟怯率親丁數十人出據北山
岡鏖戰移時矢盡力竭與二子俱死

臣

方煒按金

國鳳及楊振楊國柱

賜謚俱另載卷末謹識

金國鳳傳踞地南向坐語從官李祿曰為我告城中人

堅守援軍即日至矣

臣

方煒按李祿

賜祀忠義祠謹識

曹變蛟傳幼從文詔積軍功至遊擊

臣

方煒按三年

冬王嘉允連陷清水府谷遂據河曲是年四月變蛟與父萬年曹文耀等從文詔攻復嘉允走六月禽之見綏寇紀畧謹附識

曹變蛟傳明年連破賊紅軍友等於張麻村隴安水落城唐毛山

臣

方煒按紅軍友為神一魁餘黨文詔

縱反間給其黨殺之餘衆走唐毛山變蛟先登殄之

見明紀事本末謹附識

曹變蛟傳文詔起討陝西賊變蛟以故官從大捷金嶺
川麋真寧之湫頭鎮皆為軍鋒

臣

方煒按是時文

詔至商州追賊五十里至金嶺川賊據險遂戰變蛟
力鬪諸將曹變蛟候一位白廣恩等繼之遂大捷湫
頭鎮之後變蛟為前鋒直前衝賊斬級五百餘乘勝
窮追三十里見綏寇紀略謹附識

曹變蛟傳十月賊躡蜀中虛陷寧羌州分道三連陷三

十餘州縣

臣

方煒按是時自成與混天星過天星

一由黃壩攻七盤一由梨樹口入廣元麥坪一由陽平過青岡坪土門塔向白水見綏寇紀略所謂分三道指此謹附識

曹變蛟傳變蛟光先並鐫五官戴罪辦賊

臣

方煒按

是時並鐫承疇尚書官保見明紀事本末謹附識

曹變蛟傳變蛟轉戰千里身不解甲者二十七晝夜餘

賊潰入塞

臣

方煒按是時承疇由階文返轡逐賊

變蛟乃率張天祿賈呈芳窮追大戰羌中捷書踵至
上曰吾固知承疇往洮河非避賊其益自効見綏寇
紀略謹附識

曹變蛟傳其別部號三隊及仁義王混天王降於光先
臣方煒按是時三賊合竄寧遠亦入禮縣山中光
先張疑兵馬塢而疾馳桃坪掩擊俘斬三百餘扼其
歸路遂降於光先見明紀事本末謹附識

曹變蛟傳承疇令變蛟窮追而設三覆於潼關之南原

臣方燁按是年十月承疇謂傳庭曰自成勢蹙必奔潼關公議能設三覆以待吾蹙而致之可一戰擒也傳庭乃於潼關南原每五十里立一營變蛟躬執長刀驅賊遂殲之見綏寇紀略謹附識

曹變蛟傳變蛟廷臣及巡撫邱民仰故總兵祖大樂兵備道張斗姚恭王之楨副將江翥饒勲朱文德叅將以下百餘人皆就執見殺

臣方燁按曹變蛟及王

廷臣張斗姚恭王之楨江翥饒勲朱文德李輔明

賜謚俱另載卷末謹識

曹變蛟傳

李輔明附

輔明遼東人累官副將總兵崇禎

八年從祖寬擊賊連蹙之

臣

方煒按祖寬遼東總

兵也八年十一月張獻忠走嵩汝寬敗之于嵩縣九

皋山又敗之於汝州圯料鎮獻忠憤糾合高迎祥李

自成與寬遇於龍門白沙復敗之十二月迎祥自成

陷光州之南城寬復敗之於碓山俘斬無算見明紀

事本末謹附識

曹變蛟傳樸由父廕屢遷京營副將崇禎六年賊瞞畿南命樸與倪寵為總兵官

臣

方煒按是時潞王有

疏告急言衛輝城卑土惡選獲衛助守捐歲祿益餉又因故妃冢被發以鳳泗陵寢可虞並勸帝毋輕視賊遂有王樸倪寵之命見綏冠紀畧謹附識

臣又

按樸之加總兵也與倪寵并賜弓矢千五百戰馬三百以行職方郎李繼貞爭之曰樸原無實厯累次叙加多因父功無以慰人望且左良玉李卑等身經百

戰位次反出其下恐聞而解體宜量加左李二將以
都督僉事署總兵上從之見明紀事本末謹附識

曹變蛟傳廣恩初從混天猴為盜既降屢立戰功

臣

方煒按五年八月曹文詔與總兵賀虎臣楊騏追賊
於平涼陣斬可天飛李都司二賊廣恩遂殺其黨以
降見綏寇紀略謹附識

劉肇基傳世威罷肇基及遊擊羅岱分將其兵與祖寬
大破賊汝州斬首六千百有奇

臣

方煒按八年十

一月獻忠走嵩汝寬敗之於嵩縣肇基與羅岱敗之於蘇羊再趕汝州擊之於圪料鎮寬擊其前肇基等扼其後大破之伏屍二十餘里見綬寇紀畧謹附識

劉肇基傳副將乙邦才馬應魁莊子固等皆同死

臣

方煒按劉肇基及乙邦才馬應魁莊子固樓挺江雲龍李豫陶國祚許謹馮國用陳光玉李隆徐純仁李大忠孫開忠姚懷龍解學曾

賜謚俱另載卷末謹識

欽定四庫全書

附明史卷二百七十二考證後

乾隆四十一年

賜謚諸臣

金國鳳 曹變蛟 劉肇基

以上通謚忠烈

楊震 楊國柱 朱文德 李輔臣 乙邦才

馬應魁 莊子固 樓挺 江雲龍 李豫

陶國祚 許謹 馮國用 陳光玉 李隆

徐純仁 李大忠 孫開忠 姚懷龍 解學曾

以上通謚烈愍

王廷臣 通謚忠節

張斗 姚恭 王之楨 江翥 饒勲

以上通謚節愍

欽定四庫全書薈要卷六千八百六十六

史部

明史卷二百七十三

大學士張廷玉等奉勅修

列傳第一百六十一

左良玉

鄧紀
賀人龍

高傑

劉澤清

祖寬

左良玉字崑山臨清人官遼東車右營都司崇禎元年
寧遠兵變巡撫畢自肅自經死良玉坐削職回衛已復

官總理馬世龍令從遊擊曹文詔援玉田豐潤連戰洪橋大塹山直抵遵化論恢復四城功與文詔等俱進秩隸昌平督治侍郎侯恂麾下大凌河圍急詔昌平軍赴援總兵尤世威護陵不得行薦良玉可代率兵往已恂薦為副將戰松山杏山下錄功第一良玉少孤育於叔父其貴也不知其母姓長身頰面驍勇善左右射目不知書多智謀撫士卒得其歡心以故戰輒有功時陝西賊入河南圖懷慶廷議令良玉將昌平兵往勦大指專

辦河南會賊寇修武清化者竄入平陽因檄良玉入山
西禦之頗有斬獲河南巡撫樊尚璟以良玉駐澤州扼
豫晉咽喉可四面為援兵詔從之時曹文詔將陝西兵
帝令良玉受尚璟節制與文詔同心討賊有急則秦兵
東豫兵西良玉兵從中橫擊六年正月賊犯隰州陷陽
城良玉敗之於涉縣之西陂二月良玉兵與賊戰武安
大敗尚璟罷以太常少卿元默代之三月賊再入河內
良玉自輝縣逐之賊奔修武殺遊擊越效忠追參將陶

希謙希謙墜馬死良玉擊之萬善驛至柳樹口大敗之禽賊首數人賊遂西奔河南額兵僅七千數被賊折亡殆盡良玉將昌平兵二千餘數戰雖有功勢孤甚總兵鄧玘方立功萊州乃命將川兵益以石砭土司馬鳳儀兵馳赴良玉與共角賊已而鳳儀以孤軍戰沒於侯家莊當是時賊勢已大熾縱橫三晉畿輔河北間諸將曹文詔李卑艾萬年湯九州鄧玘良玉等先後與賊戰勝負畧相當良玉玘辦河南屢破之於官村於沁河於清

化於萬善良玉又扼之武安八德斬獲尤多會帝命倪寵王樸為總兵將京營兵六千赴河南以中官楊應朝盧九德監其軍而別遣中官監良玉等軍職方郎中李繼貞曰良玉李卑身經百戰位反在寵樸下恐聞而解體乃令良玉卑署都督僉事為援勦總兵官與寵樸體相敵京營兵至共擊賊數有功良玉敗賊濟源河內又敗之永寧青山嶺銀洞溝又自葉縣追至小武當山皆斬賊魁甚衆然諸將以中官監軍意弗善也其冬賊西

奔者復折而東良玉九州扼其前京營兵尾其後賊大困官軍連破之柳泉猛虎村賊張妙手賀雙全等三十六家詭詞乞撫於分巡布政司常道立因監軍應朝以請諸將俟朝命不出戰會天寒河冰合賊遂從澠池徑渡巡撫默率良玉九州卑珣兵待之境上賊乃竄盧氏山中由此自鄖襄入川中折而掠秦隴復出沒川中湖北以犯河南中原益大殘破而三晉畿輔獨不受賊禍者十年賊既渡河去良玉與諸將分地守陳奇瑜盧象

昇方角賊秦楚七年春夏間中州幸無事既而奇瑜失
李自成於車箱廷議合晉豫楚蜀兵四面勦之賊乃分
軍三一向慶陽一趨鄖陽而一出關趨河南趨河南者
又分為三郡邑所在告急良玉扼新安澠池他將陳治
邦駐汝州陳永福扼南陽皆坐甲自保而已不能大創
賊也賊每營數萬兵番進皆因糧宿飽我兵寡備多饋
餉不繼賊介馬馳一日夜數百里我步兵多騎少行數
十里輒疲之以故多畏賊而良玉在懷慶時與督撫議

不合因是生心緩追養寇多收降者以自重督撫檄調不時應命稍稍露跋扈端矣十二月遇賊於磁山大戰數十追奔百餘里八年正月河南賊破潁州毀鳳陽皇陵其陷鹿邑柘城寧陵通許者良玉在許州不能救四月督師洪承疇在汝州令諸將分地遮賊尤世威守雒南陳永福控盧氏永寧鄧玘尤翟文張應昌許成名遏湖廣以吳村瓦屋乃內鄉浙川要地令良玉與湯九州以五千人扼之未幾鄧玘以兵譁死而曹文詔討陝賊

敗沒於真寧賊益張遂越盧氏奔永寧巡撫默被逮未
去檄良玉自內鄉與陳治邦馬良文等援盧氏八月敗
賊於鄆陵九月躡賊於邾之神垕山賊連營數十里番
休更戰以疲我兵良玉收其軍而止賊再攻密良玉自
邾援之乃去十月良玉抵靈寶合遼東總兵祖寬兵剪
賊於澗口焦村焦村朱陽關地也十一月李自成出朱
陽關張獻忠久據靈寶闖王高迎祥亦與合良玉寬禦
之靈寶不能支陝州陷賊東下攻洛陽良玉寬從巡撫

陳必謙救洛陽賊乃去迎祥自成走偃師鞏獻忠走嵩
汝良玉出雒追迎祥自成寬分擊獻忠救汝會總理盧
象昇至自湖廣與寬大敗賊汝西令裨將破賊於宜陽
黃澗口九年二月賊敗於登封郛城鎮走石陽關與伊
嵩之賊合故總兵九州由嵩縣深入與良玉夾勦良玉
中道遁歸九州乘勝窮追四十里無援敗歿良玉反以
捷聞五月象昇遣祖寬李重鎮隨陝西總督洪承疇西
行良玉軍最強又率中州人故獨久留之而以其驕亢

難用用孔道興代其偏將趙柱駐靈寶防維西良玉與

羅岱駐宜永防維東八月良玉兵抵開封由登封之唐

莊深入擊賊自辰鏖至申賊不支西走陳永福方敗賊

於唐河賊至田家營良玉渡河擊之斬獲頗衆九月巡

撫楊繩武劾良玉避賊責令戴罪自贖十年正月賊老

獾合曹操闖塌天諸部沿流東下安慶告警詔良玉

從中州救之良玉勦殺南陽土寇楊四侯馭民郭三海

急抵六安與賊遇部將岱道興乘勝連戰大破賊賊走

霍山潛山會馬嶺劉良佐亦屢敗賊於桐城廬州六安賊在滁和者亦西遁江北警少息應天巡撫張國維三檄良玉入山搜勦不應放兵掠婦女屯舒城月餘河南監軍太監力促之始北去賊已飽掠入山矣已浙川陷良玉擁兵不救以六安破賊功詔落職戴罪尋復之賊東下襲六合攻天長分掠瓜洲儀真破盱眙良玉堅不肯救令中州士大夫合疏留已帝知出良玉意不能奪也十月總理熊文燦至安慶部檄以良玉軍隸馬良玉

輕文燦不為用十一年正月良玉與總兵陳洪範大破賊於鄖西張獻忠假官旗號襲南陽屯於南關良玉適至疑而急召之獻忠逸去追及發兩矢中其肩復揮刀擊之面流血其部下救以免遂逃之穀城未幾請降良玉知其偽力請擊之文燦不許九月文燦勦鄖襄諸賊良玉與洪範及副將龍在田擊破之雙溝營斬首二千餘級十二月河南巡撫常道立調良玉於陝州賊乘盧氏虛遁入內浙是月許州兵變良玉家在許殲馬十二

年二月良玉率降將劉國能入援京師詔還討河南賊
兵過灞頭吳橋大掠太監盧九德疏聞詔令戴罪已而
破賊馬進忠於鎮平關進忠降又與國能再破賊李萬
慶於張家林七里河萬慶亦降七月獻忠叛去良玉與
羅岱追之使岱為前鋒已隨其後逾房縣八十里至羅
猴山軍乏食伏起岱馬掛於藤抽刀斷之蹶而復進棄
馬登山賊圍急矢盡被獲良玉大敗奔還軍符印信盡
失棄軍資千萬餘士卒死者萬人事聞以輕進貶三秩

十三年春督師楊嗣昌薦良玉雖敗有大將才兵亦可用
遂拜平賊將軍當是時賊分為三西則張獻忠踞楚蜀
郊東則革裏眼左金王等四營豕突隨應麻黃南則曹
操過天星等十營伏漳房興遠間明年閏正月良玉合
諸軍擊賊枸坪關獻忠敗走良玉乃請從漢陽西鄉入
蜀追之嗣昌謀以陝西總督鄭崇儉率賀人龍李國安
從西鄉入蜀而令良玉駐兵興平別遣偏將追勦良玉
不從嗣昌檄良玉曰賊勢似不能入川仍當走死秦界

耳將軍從漢陽西鄉入川萬一賊從舊路疾趨平利仍入竹房將何以禦不則走寧昌入歸巫與曹操合我以大將尾追促賊反楚非算也良玉報曰蜀地肥衍賊渡險任其奔軼後難制且賊入川則有糧可因回鄖則無地可掠其不復竄楚境明矣夫兵合則強分則弱今已留劉國能李萬慶守鄖若再分三千人入蜀即駐興平兵力已薄賊來能遏之耶今當出其不意疾攻之一大創自然瓦解縱折回房竹間人跡斷絕彼從何得食況

鄖兵扼之於前秦撫在紫興扼之於右勢必不得逞若
寧昌歸巫險且遠曹操獻忠不相下倘窮而歸曹必內
相吞其亡立見良玉已於二月朔涉蜀界之漁溪渡矣
嗣昌度力不能制而其計良是遂從之時獻忠營太平
縣大竹河良玉駐漁溪渡未幾總督崇儉引其兵來會
賊移軍九滾坪見瑪瑙山峻險將據之良玉始抵山下
賊已踞山顛乘高鼓譟良玉下馬周覽者久之曰吾知
所以破賊矣分所進道為三已當其二秦兵當其一令

曰聞鼓聲而上兩軍夾擊賊陣堅不可動鏖戰久之賊大潰墜崖澗者無算追奔四十里良玉兵斬掃地王曹威白馬鄧天王等渠魁十六人獻忠妻妾亦被擒遁入興山歸州之山中尋自鹽井竄興歸界上是役也良玉功第一事聞加太子少保四月良玉進屯興安平利諸山連營百里諸軍憚山險圍而不攻久之獻忠自興房走白羊山而西與羅汝才合七月良玉乘勝擊過天星降之過天星者名惠登相既降遂始終為良玉部將初

良玉受平賊將軍印寢驕不肯受督師約束而賀人龍
屢破賊有功嗣昌私許以人龍代良玉及良玉奏瑪瑙
山捷嗣昌語人龍須後命人龍大恨具以前語告良玉
良玉亦內恨當獻忠之敗走也追且及遣其黨馬元利
操重寶啗良玉曰獻忠在故公見重公所部多殺掠而
閣部猜且專無獻忠即公滅不久矣良玉心動縱之去
監軍萬元吉知良玉跋扈不可使勸嗣昌令前軍躡賊
後軍繼之而身從間道出梓潼扼歸以俟濟師嗣昌不

用賊既入蜀之巴州人龍兵譟而西歸召良玉兵合擊

九檄皆不至十四年正月諸軍追賊開縣之黃陵城參

將劉士杰深入所當披靡獻忠登高望見無秦人旗幟

而良玉兵前部無鬪志獨士杰孤軍迺密選壯士潛行

箐谷中乘高大呼馳下良玉兵先潰總兵猛如虎潰圍

出嗣昌方悔不用元吉言而獻忠已席卷出川西絕新

開驛置楚蜀消息中斷遂以計紿入襄陽城襄王被執

嗣昌不食卒賊瀕死復縱迄以亡國者以良玉素驕蹇

不用命故也二月詔良玉削職戴罪平賊自贖五月獻
忠陷南陽即攻泌陽破之良玉至南陽賊遁去良玉不
戢士泌人脫於賊者遇官軍無噍類既而獻忠陷鄖西
掠地至信陽屢勝而驕良玉乃從南陽進兵復大破之
降其衆數萬獻忠中股負重傷夜遁而是時李自成方
殘襄城圍良玉於偃城幾陷會陝西總督汪喬年出關
自成乃輟圍與喬年戰襄陽城外喬年軍盡覆良玉不
能救帝既斬賀人龍以肅軍政專倚良玉辨賊十五年

三月自成復圍開封乃釋故尚書初薦良王者侯恂於
獄起為督師發帑金十五萬犒良玉營將士激勸之良
玉及虎大威楊德政會師朱仙鎮賊營西官軍營北良
玉見賊勢盛一夕拔營遁衆軍望見皆潰自成戒士卒
待良玉兵過從後擊之官軍幸追者緩疾馳八十里賊
已於其前穿塹深廣各二尋環繞百里自成親率衆遮
於後良玉兵大亂下馬渡溝僵仆溪谷中趾其顛而過
賊從而蹂之軍大敗棄馬騾萬匹器械無算良玉走襄

陽帝聞良玉敗詔恂拒河圖賊而令良玉以兵來會良玉畏自成遷延不至九月開封以河決而亡帝怒恂罷其官不能罪良玉也開封既亡自成無所得遽引兵西謀拔襄陽為根本時良玉壁樊城大造戰艦驅襄陽一郡人以實軍諸降賊附之有衆二十萬然親軍愛將大半死而降人不奉約束良玉亦漸衰多病不復能與自成角矣自成乘勝攻良玉良玉退兵南岸結水寨相持以萬人扼淺洲賊兵十萬爭渡不能遏良玉乃宵遁引

其舟師左步右騎而下至武昌從楚王乞二十萬人餉
曰我為王保境王不應良王縱兵大掠火光照江中宗
室士民奔竄山谷多為土寇所害驛傳道王揚基奪門
出良王兵掠其貲并及其子女自十二月二十四日抵
武昌至十六年正月中兵始去居人登蛇山以望叫呼
更生曰左兵過矣良王既東自成遂陷承天旁掠諸州
縣當是時降兵叛卒率假左軍號恣剽掠蘄州守將王
允成為亂首破建德劫池陽去蕪湖四十里泊舟三山

荻港漕艘鹽船盡奪以載兵聲言諸將寄帑南京請以
親信三千人與俱南京諸文武官及操江都御史至陳
師江上為守禦士民一夕數徙商旅不行都御史李邦
華被召道湖口草檄告良玉以危詞動之而令安慶巡
撫發九江庫銀十五萬兩補六月糧軍心乃定邦華入
見帝論良玉潰兵之罪請歸罪於王允成帝乃令良玉
誅允成而獎其能定變良玉卒留允成於軍中不誅也
良玉留安慶久之徐溯九江上聞獻忠破湖廣沉楚王

於江坐視不救八月乃入武昌立軍府招徠下流粗定
會賊自長沙陷袁州命副將吳學禮赴援江西巡撫郭
都賢惡其淫掠檄歸之自募土兵戍守未幾賊突陷吉
安復陷袁州岳州良玉遣馬進忠援袁州馬士秀援岳
州士秀率水師敗賊岳州二城竝復時帝命兵部侍郎
呂大器代侯恂為總督恂解任中道逮下獄良玉知為
已故心鞅鞅與大器齟齬賊連陷建昌諸府大器無兵
不能救良玉亦不援進忠與賊戰嘉魚再失利良玉軍

遂不振會獻忠從荆河入蜀良玉遣兵追之距荊州七
十里荆襄諸賊因自成入關盡懈良玉偵知乃遣副將
盧光祖上隨東承德而惠登相自均房劉洪起自南陽
特賊後收其空虛地以自為功十七年正月詔封良玉
為寧南伯昇其子夢庚平賊將軍印功成世守武昌命
給事中左懋第便道督戰良玉乃條日月進兵狀以聞
疏入未奉旨聞京師被陷諸將洶洶以江南自立君請
引兵東下良玉慟哭誓不許副將士秀奮曰有不奉公

令復言東下者吾擊之以巨艦置礮斷江衆乃定福王
立晉良玉為侯廕一子錦衣衛正千戶且竝封黃得功
高傑劉澤清劉良佐為諸鎮俱廕子世襲而以上流之
事專委良玉尋加太子太傅時李自成敗於關門良玉
得以其間稍復楚西境之荊州德安承天而湖廣巡撫
何騰蛟及總督袁繼咸居江西皆與良玉善南都倚為
屏蔽良玉兵八十萬號百萬前五營為親軍後五營為
降軍每春秋肄兵武昌諸山一山幟一色山谷為滿軍

法用兩人夾馬馳曰過對馬足動地殷如雷聲聞數里
諸鎮兵惟高傑最強不及良玉遠甚然良玉自朱仙鎮
之敗精銳畧盡其後歸者多烏合軍容雖壯法令不復
相懾良玉家殲於許州其在武昌諸營優娼歌舞達旦
良玉塊然獨處無姬侍嘗夜宴僚佐召營妓十餘人行
酒履舄交錯少焉左顧而歎以次引出賓客肅然左右
莫敢仰視其統馭有體為下所服多此類而是時良玉
已老且病無中原意矣良玉之起由侯恂恂故東林也

馬士英阮大鍼用事慮東林倚良玉為難謾語修好而陰忌之築板磯城為西防良玉歎曰今西何所防殆防我耳會朝事日非監軍御史黃澍挾良玉勢面觸馬阮既返遣緹騎逮澍良玉留澍不遣澍與諸將日以清君側為請良玉躊躇弗應亡何有北來太子事澍借此激衆以報已怨召三十六營大將與之盟良玉反意乃決傳檄討馬士英自漢口達蘄州列舟二百餘里良玉疾已劇至九江邀總督袁繼咸入舟中袖中出密諭云自

皇太子劫諸將盟繼咸正辭拒之部將郝效忠陰入城縱火殘其城而去良玉望城中火光曰予負袁公嘔血數升是夜死時

順治二年四月也諸將秘不發喪共推其子夢庚為留後七日軍東下朝命黃得功渡江防勦初夢庚自立佯語繼咸至池州候旨抵池繼咸密以疏聞道梗不得達惠登相者初為賊既降為良玉副將諸軍自彭澤下連陷建德東流殘安慶城獨池州不破貽書登相曰留此

以待後軍登相大詔曰若此則我反不如前為流賊時
矣如先帥末命何檄其軍返夢庚見黑旗船西上索輕
舸追及之登相與相見大慟以夢庚不足事引兵絕江
而去諸將乃議旋師時

大清兵已下泗州逼儀真矣夢庚遂偕澍以衆降於九
江鄧玘四川人天啟初從軍積功得守備安邦彥反玘
追賊織金勇冠諸將已敗績河濱魯欽敗歿賊犯威清
玘夜斫營走賊進都司僉書討敗苗酋李阿二自貴州

用兵裨將楊明楷劉志敏張雲鵬竝驍勇不得為大將
惟玘以功名聞崇禎初屢遷四川副總兵與侯良柱共
斬安邦彥京師有警率六千人勤王共復遵永四城加
署都督僉事世廕千戶尋擢總兵官鎮守遵化戰喜峯
口及洪山竝有功進秩為真五年春叛將亂登萊王洪
等無功玘自請行命為援勦總兵官與洪及劉國柱禦
賊沙河戰相當已而遁走賊乘之大敗尋與諸將金國
奇等復登萊二城錄功進署都督同知玘戍遵化久思

歸及登萊事竣復以為言會賊入河北言者請令玘勦
玘怏怏而行給事中范淑泰劾玘虐民帝不問旋遣近
侍監其軍玘至濟源射殺王自用於善陽即賊紫金梁
也頃之走賊礪州拒却之彭城鎮與左良玉擊賊清池
柳莊賊走林縣玘部將楊遇春邀賊中伏死賊用其旗
并誘殺他將自是輕玘俄與良玉逐賊沙河賊圍湯陰
玘被困上樵窩良玉救乃免已共破賊官村沁河清池
萬善移師畿南敗賊白草關賊犯平山敗之紅子店馬

種川賊遁青石嶺敗之紅澗村醉漢口賊犯臨城敗之
魚桂嶺當是時賊蔓河朔及畿南天子特遣倪寵王樸
將京軍而保定梁甫河南左良玉湯九州合玘軍足殄
賊羣帥勢相軋彼此觀望託山深道岐以自解莫利先
入賊遂由澠池南渡而諸帥各有近侍為中軍事易掩
飾所報功多不以實也十一月賊南遁玘追敗之澠池
扣子山至宜陽盧氏而還是月以玘為保定總兵官代
梁甫七年正月以賊盡入鄆襄命玘援勦解南漳圍尋

敗賊胡地冲斬闖天王九條龍草上飛抓山虎雙翼虎
勦房縣竹山南漳賊戰獅子崖石漳山斬一隻虎滿天
飛已擊賊洵陽也家溝連戰皆捷獲首功一千有奇八
月敎五峯山破賊功進右都督玘不善馭軍軍心亦不
附譟於鄖西玘渡河以避之總督陳奇瑜犒慰乃定奇
瑜集諸將討竹山竹溪諸賊玘頻有功十一月賊大入
河南命玘援勦八年春賊陷新蔡知縣王信罵賊死玘
追敗賊羅山是時賊陷鳳陽命玘自黃州速援安慶及

桐城被圍玘竟不至御史錢守廉劾玘勦賊羅山殺良
冒功命總督洪承疇核之四月承疇至汝州令玘戍樊
城防漢江是月部將王允成以剋餉鼓譟殺其二僕玘
懼登樓越牆墮地死玘由小校大小數百戰所向克捷
以久戍缺望恣其下淫掠大學士王應熊以鄉里庇之
玘益無所憚其死也人以為逸罰云賀人龍米脂人初
以守備隸延綏巡撫洪承疇麾下崇禎四年承疇受賊
降命人龍勞以酒伏兵擊斬三百二十人其冬張福臻

代承疇遣人龍勦賊黨雄斬獲二百有奇明年夏從福
臻禽賊孫守法其秋以所部援勦山西六年春與總兵
尤世祿復遼州已敗賊垣曲絳縣進都司僉事又連破
賊水頭鎮花池塞湯湖村會山西賊幾盡乃還陝西從
巡撫陳奇瑜討平延川賊俘斬一千有奇奇瑜擢總督
以人龍自隨七年四月擊賊隰州禽剋天虎進參將奇
瑜追賊鄖襄興漢人龍竝有功賊軼車箱峽陷隴州西
去奇瑜遣人龍救之甫入隴州李自成復至環攻以人

龍同里閉遣其將高傑移書令反人龍不報固守兩月
左光先救至圍始解十二月敗賊中莊明年正月鳳陽
陷總督洪承疇遣人龍馳救敗賊睢州進副總兵承疇
以陝西急率人龍入關商洛賊馬光玉等薄西安距大
軍五十里承疇命人龍入子午谷邀賊之南別將劉成
功王永祥邀賊之北張全昌從咸陽繞興平東賊以此
不敢南遁盡走武功扶風又渡渭走郿縣承疇追至王
渠鎮賊方掠南山人龍成功等與戰追奔三十里至大

泥峪賊棄馬登山走七月高迎祥張獻忠掠秦安清水
人龍偕全昌破之張家川已而失利都司田應龍等死
八月高傑降承疇令人龍及遊擊孫守法挾之趨富平
乘夜擊敗賊人龍尋移守延綏九年七月從巡撫孫傳
庭大破賊整屋禽迎祥九月惠登相等屯寶雞承疇遣
人龍等往擊戰於賈家村追奔為賊所截川將曾榮耀
等來援敗去人龍坐禡官立功十年小紅狼圍漢中瑞
王告急承疇率人龍兵由兩當趨救賊解去詔復人龍

官徽秦逸賊東趨平鳳人龍躡至柳林不利賊窺西安人龍禦之斬獲多其冬自成登相入四川承疇率人龍等往援歲暮至廣元賊已逼成都自成別由松潘還陝右十一年承疇督人龍等自階文窮追自成走入西羌界人龍與曹變蛟等大戰二十七日自成引殘卒入塞竄山中謀入四川為人龍及馬科所追突漢中扼於左光先其黨祁總管降自成幾滅詳變蛟傳其冬京師戒嚴擢人龍總兵官帥師入衛人龍所部多降賊至山西

而譟尋撫定抵京與變蛟等奏捷於太平明年事定還
陝西其秋張獻忠羅汝才叛謀入陝人龍及副將李國
奇等扼之興安乃入川東楊嗣昌檄陝西總督鄭崇儉
率人龍國奇軍會勦十二月人龍擊賊大敗之十三年
二月與左良玉大破賊瑪瑙山人龍得一千三百餘級
降賊將二十五人六月汝才登相犯開縣總兵鄭嘉棟
擊之仙寺嶺人龍擊之馬弱溪共斬首一千二百汝才
登相東西走追之不能及時賊盡集於川監軍萬元吉

令川將守巴巫諸隘人龍國奇及楚將張應元汪雲龍
張奏凱專主追擊及應元軍入夔營土地嶺人龍逗留
不至諸軍遂大敗人龍竟還陝已而獻忠汝才陷劍州
趨廣元將從間道入漢中人龍拒之陽平百丈二關賊
乃退十二月嗣昌至重慶三檄人龍會師不至初嗣昌
惡左良玉許人龍代為平賊將軍及戰瑪瑙山良玉功
第一嗣昌語人龍姑待之人龍大失望效良玉所為不
奉約束嗣昌亦不能制賊陷瀘州而北人龍屯小市廂

隔一水不擊賊遂越成都走漢川德陽人龍軍大譟而歸十四年三月嗣昌卒丁啟睿代令人龍國奇出當陽擊敗自成於靈寶山中人龍子大明戰歿九月總督傅宗龍統人龍國奇軍出關次新蔡遇賊孟家莊將戰人龍先走國奇戰不勝亦走宗龍遂歿十五年正月總督汪喬年出關擊賊人龍及鄭嘉棟牛成虎從至襄城遇賊復不戰走喬年亦歿帝大怒欲誅之慮其為變姑奪職戴罪視事及孫傳庭督師陝西帝授以意人龍駐咸

陽虞禍曉夜為備傳庭以人龍家米脂其宗族多在賊中未可輕發在道佯上疏曰人龍臣舊將願貫其罪俾從臣自效帝亦佯許之人龍稍自安傳庭至陝密與巡撫張爾忠謀以五月朔召人龍計事數其罪斬之其部將周國卿將精卒二百人與同黨魏大亨賀國賢高進庫等將逃還涇陽取其孥與賊為亂爾忠遣參將孫守法先入涇陽質其妻子國卿窮謀斬大亨等以降爾忠密聞之大亨遂斬國卿函送其首他部將高傑高汝利

賀勇董學禮等十四人俱仍故官一軍乃定

高傑米脂人與李自成同邑同起為盜崇禎七年閏八月總督陳奇瑜遣參將賀人龍救隴州被圍大困自成令傑遺書約人龍反不報使者歸先見傑後見自成比圍城兩月不拔自成心疑傑遣別部將往代傑歸守營自成妻邢氏趨武多智掌軍資每日支糧仗傑過氏營分合符驗氏偉傑貌與之通恐自成覺謀歸降次年八月遂竊邢氏來歸洪承疇以付人龍使其遊擊孫守法

挾以破賊取立效為信自是傑常隸人龍麾下十三年
張獻忠敗於瑪瑙山竄興歸界上傑隨人龍及副將李
國奇大敗之鹽井十五年人龍以罪誅命傑為實授遊
擊十月陝西總督孫傳庭至南陽自成與羅汝才西行
逆之傳庭以傑與魯某為先鋒過於塚頭大戰敗賊追
奔六十里汝才見自成敗來救遠出官軍後後軍左勦
望見賊怖而先奔衆軍皆奔遂大潰傑所亡失獨少十
六年進副總兵與總兵白廣恩為軍鋒兩人皆降將也

廣恩驚驚素不奉約束而傑尤凶暴朝廷以傑為自成所切齒故命隸傳庭辦賊九月從傳庭克寶豐復郿縣時官軍乘勝深入乏食降將李際遇通賊自成帥精騎大至傳庭問計於諸將傑請戰廣恩不可傳庭以廣恩為怯廣恩不懌引所部遁去官軍接戰陷伏中傑登嶺上望之曰不可支矣亦麾衆退軍遂大奔死者數萬廣恩走汝州不救傑乃隨傳庭走河北已而自山西渡河轉入潼關廣恩已先至十一月自成攻關廣恩力戰而

傑怨廣恩以寶豐之敗不救已亦擁衆不肯救廣恩戰敗開遂破傳庭被殺自成破西安據之傑北走延安賊將李過追傑傑東走宜川河冰適合遂渡入蒲津以守賊至冰解不得渡乃免廣恩既敗走固原為賊將追及遂以城降十七年進傑總兵帝令總督李化熙率傑兵馳救山西而蒲州平陽已陷久傑退至澤州沿途大掠賊遂薄太原京師陷傑南走福王封傑興平伯列於四鎮領揚州駐城外傑固欲入城揚州民畏傑不納傑攻

城急日掠廂村婦女民益惡之知府馬鳴騷推官湯來
賀堅守月餘傑知不可攻意稍怠閣部史可法議以瓜
洲予傑乃止九月命傑移駐徐州以左中允衛允文兼
兵科給事中監其軍西討徐州土賊程繼孔被禽至京
師乘李自成亂逃歸十二月傑禽斬之加太子少傅廕
一子世襲錦衣僉事初傑伏兵要擊黃得功於土橋得
功幾不免兩鎮遂相仇怨事見得功傳傑爭揚州時可
法頗為所窘至是傑感可法忠與謀恢復議調得功與

劉澤清二鎮赴邳宿防河傑自提兵直趨歸開且瞰宛洛荆襄以為根本遂具疏上之語激切且云得功與臣猶介介前事臣知報君雪恥而已安能與同列較短長哉然得功終不欲為傑後勁而澤清尤狡橫難任可法不得已調劉良佐赴徐與傑為聲援

順治二年正月傑抵歸德總兵許定國方駐睢州有言其送子渡河者傑招定國來會不應復邀巡撫越其杰巡按陳潛夫同往睢州定國始郊逆其杰諷傑勿入城

傑心輕定國不聽遂入城十一日定國置酒享傑傑飲

酣為定國刻行期且微及送子事定國益疑無離睢意

傑固促之行定國怒夜伏兵傳礮大呼其杰等急遁走

傑醉臥帳中未起衆擁至定國所殺之先是傑以定國

將去睢盡發兵戍開封所留親卒數十人而已定國偽

恭順多選妓侍傑而以二妓偶一卒寢卒盡醉及聞礮

欲起為二妓所掣不得脫皆死明日傑部下至攻城老

弱無子遺定國走降

大清軍傑為人淫毒揚民聞其死皆相賀然是行也進
取意甚銳故時有惜之者始朝廷許諸鎮與聞國是故
傑屢條奏救降賊者及請釋武愔於獄不允復疏薦吳
姓鄭三俊金光辰姜琛熊開元金聲沈正宗等大抵其
時武臣風尚多類此傑死贈太子太保以其子元爵襲
興平伯劉澤清曹縣人以將材授遼東寧前衛守備遷
山東都司僉書加參將崇禎三年

大清兵攻鐵廠欲據以絕豐潤糧道援守三屯總兵楊

肇基遣澤清來援未至鐵廠一十五里遇

大兵力戰自辰至午不決得濟師轉戰至遵化夾擊遂
得入城敘功加二級至副總兵五年以侵剋軍糧被劾
詔立功衝要地六年遷總兵其冬加左都督恢復登州
有功八年詔統山東兵防漕九年京師戒嚴統兵入衛
令駐新城為南北控扼復命留守通州加左都督太子
太師十三年五月山東大饑民相聚為寇曹濮尤甚帝
命澤清會總兵楊御蕃兵勦捕之八月降右都督鎮守

山東防海澤清以生長山東久鎮東省非宜請辭任帝
令整旅渡河合諸鎮星馳援勦十六年二月賊圍開封
久澤清赴援以朱家寨去汴八里提五千人南渡倚河
為寨疏水環之欲以次結八寨達大堤築甬道饋饌城
中壁壘未成賊來爭相持三日互有殺傷澤清即命拔
營去惶擾奔迸士爭舟多溺死者澤清為人性恒怯懷
私觀望嘗妄報大捷邀賞賜又詭稱墮馬被傷詔賚藥
資四十兩命赴保定勦賊不從日大掠臨清率兵南下

所至焚劫一空寇氛日急給事中韓如愈馬嘉植皆謀
奉使南歸如愈常劾澤清過東昌澤清遣人殺之於道
無敢上聞者京師陷澤清走南都福王以為諸鎮之一
封東平伯駐廬州時武臣各占分地賦入不以上供恣
其所用置封疆兵事一切不問與廷臣互分黨援干預
朝政排擠異己奏牘紛如紀綱盡裂而澤清所言尤狂
悖王初立即援靖康故事請以今歲五月改元又請宥
故輔周延儒助餉賊銀都御史劉宗周劾諸將跋扈狀

澤清遂兩疏劾宗周且曰上若誅宗周臣即卸職朝廷不得已溫詔解之又請禁巡按不得拏訪追賊請法司嚴緝故總督侯恂及其子方域朝廷皆曲意從之

順治二年四月揚州告急命澤清等往援而澤清即於是月迎降

大清授為三等子五年九月謀叛事覺磔誅之澤清頗涉文藝好吟咏嘗召客飲酒唱和幕中蓄兩猿以名呼之即至一日宴其故人子酌酒金甌中甌可容三升許

呼猿捧酒跪送客猿猱甚客戰掉逡巡不敢取澤清
笑曰君怖耶命取囚撲死堦下剜其腦及心肝置甌中
和酒付猿捧之前飲醕顏色自若其兇忍多此類

祖寬遼東人少有勇力給侍祖大壽家從軍有功累官
寧遠參將部卒多塞外降人所向克捷崇禎五年七月
叛將李九成等圍萊州急詔發關外兵討之寬與靳國
臣祖大弼張韜率兵抵昌邑巡撫朱大典獲賊書約寬
等為內應以示寬等皆誓滅賊以自明乃用寬國臣為

前鋒寬至沙河與賊遇衆寡不敵稍却會國臣至拔刀大呼直前寬大弼韜咸殊死戰大敗賊兵逐北抵城下立解萊州圍是月晦進兵黃縣賊傾巢出戰寬等復大敗之遂與劉澤清等築長圍以困登州明年二月賊始平語詳大典傳寬以解圍功進都督僉事再敘功世廕外衛副千戶進副總兵八年秋命為援勦總兵官督關外兵三千討流賊十月至河南巡撫陳必謙監紀推官湯開遠令與左良玉抵靈寶至則挫張獻忠於焦村無

何高迎祥李自成至與獻忠合攻閬鄉寬赴救賊解而趨靈寶斷良玉寬軍不相應遂東陷陝州攻洛陽良玉寬至迎祥自成獻忠皆走良玉追迎祥而寬分擊獻忠夜督副將祖克勇等趨葛家莊黎明遇賊大破之賊奔嵩縣九臯山寬伏二軍於山溝誘之賊趨下伏發斬馘九百有奇尋與副將劉肇基羅岱遇賊汝州圪料鎮復大敗賊伏屍二十餘里斬馘千六百有奇獻忠憤合迎祥自成兵與寬戰龍門白沙截官軍為二寬自斷後士

卒殊死鬪自晨至夜分復大捷斬馘一千有奇迎祥自成乃走窺光州寬督副將李輔明躡其後賊走攻確山寬等馳救大破之斬馘五百八十有奇自成等遂東走廬州攻圍七晝夜明年正月寬等至賊奔全椒遂圍滁州南京太僕卿李覺斯知州劉大輦力禦之而寬等軍至奮擊大呼諸軍無不一當百自晨至晡賊大敗從城東五里追至關山之朱龍橋橫屍枕籍水為不流二月又從總理盧象昇破賊七頂山殲自成精卒殆盡象昇

移軍南陽命寬備鄧州會賊渡漢江入鄖襄餘衆三萬
匿內鄉浙川山中象昇命寬與祖大樂等入山搜討邊
軍強慙性異他卒不可以法繩往時官軍多關中人與
賊鄉里臨陣相勞苦拋生口棄輜重即縱之去謂之打
活仗邊軍不通言語逢賊即殺故多勝然所過焚廬舍
淫婦女恃功不戢又利野戰憚搜山且見賊遠竄非旬
朔可定自以為客將無持久心寬卒方過河譟而逸象
昇激勸再三始聽命至黨子口仍按甲不行而總兵李

重鎮素恒怯冀卸責衆益思歸象昇乃力陳入山搜勦之難請令寬重鎮赴關中討賊會總督洪承疇亦請之寬等遂移軍陝西隸承疇麾下八月京師被兵召入衛錄滁州功進右都督賚銀幣事定命赴寧遠協守十一年冬詔寬率師援畿輔及山東告急寬逗遛明年正月濟南失守褫職被逮坐失陷藩封竟棄市寬敢戰有功稱驍將性剛使氣不為文吏所喜卒致大辟莫為論救贊曰左良玉以驍勇之材頻殲劇寇遂擁強兵驕亢自

恣緩則養寇以貽憂急則棄甲以致潰良由制馭失當
跋扈遂形迫其後雖欲正其不用命之罪而勢有不能
是以卒至稱兵犯闕而不顧也高傑祖寬皆剛悍難馴
恃功不戢而傑尤為兇鷙然傑被戕於銳意進取之時
寬受誅於力戰赴援之後死非其罪不能無遺憾焉

明史卷二百七十三

欽定四庫全書

明史卷二百七十三考證

左良玉傳會賊寇修武清化者竄入平陽因檄良玉入
山西禦之

臣

方煒按良玉以五年冬入晉十二月

賊抵王屋山犯西陽衆二萬官兵二千餘人以礮擊
之賊死者三百遂西遁聚於高平之側見綏寇紀略
謹附識

左良玉傳河南巡撫樊尚璟以良玉駐澤州扼豫晉咽

喉可四面為援兵

臣方煒按良玉疏言良玉在澤

州北可援高平長子東可救臨縣潞安西可應陽城沁水既保晉境兼顧濟源見明紀事本末所謂四面為援者指此謹附識

左良玉傳良玉兵與賊戰武安敗

臣方煒按良玉武

安之後賊以四萬從趙寨而東中軍曹鳴鶚馬擢遇之於卽原關鳴鶚與戰勝之翼日鳴鶚力戰賊益衆移營與擢合為所乘二將及裨將姚應鶚皆死賊遂

走輝縣見綏寇紀略謹附識

左良玉傳賊奔修殺遊擊越效忠追參將陶希謙希

謙以墜馬死

臣方煒按越效忠陶希謙及楊遇春

王信田應龍張應春

賜謚俱另載卷末謹附識

左良玉傳而鳳儀以孤軍戰沒於侯家莊

臣方煒按

是時鳳儀被圍於侯家莊保撫中軍孫宏謨楊芳不

救一軍盡沒見明紀事本末謹附識

左良玉傳良玉九州扼其前京營兵尾其後賊大困

臣方煒按是時九州勝之於青店石岡京兵勝之於石坡牛尾賊遂大困見綏寇紀略謹附識

左良玉傳扼新安渰池

臣方煒按是時河南賊從商

東抵渰池者為闖王過天星從商南趨河汝者為老
狃狃從碓南上津踰鄖陽抵鄧州者為橫天王九條
龍共七十二營見明紀事本末所謂又分為三者指

此謹附識

左良玉傳尤世威守碓南

臣方煒按是時命世威與

徐來朝守碓南之蘭川朱陽關既而來朝不肯入
山兵譁於盧氏七月兵變來朝遁見綏寇紀略謹附
識

左良玉傳八月敗賊於鄢城

臣方煒按鄢陵之勝為

八月二十六日是日馬文良與李雲程敗之於鼓祖
店見明紀事本末謹附識

左良玉傳賊再攻密良玉自邳授之乃去

臣方煒按

賊先於九月六日自嵩華趨邾禹攻密縣知縣苗之
庭敗之城下至二十六日再攻之三晝夜之庭垂堙
殺賊三百餘人良玉至乃去見明紀事本末謹附識
左良玉傳總理熊文傑至安慶部檄以至良玉軍隸

臣方煒按是時文燦至安慶所隨黔兵千人無騎上
疏請戰馬三千匹嗣昌因命良玉隸之見明紀事本
末謹附識

左良玉傳是月許州兵變

臣方煒按許州之變先是

馬士英杜應金降良玉以其衆八千人命知許州董
夢蘭處之郊良玉孥與賄皆寄焉至是士秀應金僞
傳左軍號入城劫庫殺賊官挈其貲投李萬慶夢蘭
逃以免見明紀事本末謹附識

左良玉傳良玉家在許殲焉

臣方燁按良玉許州之

敗妻女俱為自成所得厚奉養之以其女配賊將王
四後遣至武安冀以致良玉良玉不應以金帛遣歸
之見綏寇紀略與傳異謹附考

左良玉傳良玉兵掃地王曹威白馬鄧天王王等渠魁
十六人臣方煒按良玉礪礪山之役陣降賊將三
百三十八人獲馬羸千餘頭甲仗軍資以數千計見
綏寇紀略謹附識

左良玉傳是時李自成方殘襄城圍良玉於偃城幾陷
會陝西總督汪喬年出關自成乃輟圍與喬年戰襄
陽城外臣方煒按是時良玉過臨潁殺賊所置偽
官盡獲其牛馬財物自成怒盡銳與爭而喬年則於

撫秦時檄發自成祖塋者也故復輟園與戰見綏寇
紀略謹附識

左良玉傳乃釋故尚書初薦良玉者侯洵於獄起為督
師臣方煒按是時並拔河內令王漢為御史監良
玉軍見明紀事本末謹附識

左良玉傳開封以河決而亡臣方煒按是時良玉遣
其將金聲桓以五千人從洵而詭云身率三十萬會
於河北久之不至恠遂亡見綏寇紀略謹附識

左良玉傳諸將降賊附之

臣方煒按所謂降賊者謂

惠登相常國安馬進忠馬士英杜應金吳學禮等見
綏寇紀略謹附識

左良玉傳都御史李邦華被召道湖口草檄告良玉以
危詞動之

臣

方煒按邦華檄定左軍後親入其營

坐樓船大閱士馬慰勞諸將良玉令於軍斬淫殺者
四人以徇釋被掠男婦四千餘人還漕鹽船五百餘
艘見明紀事本末謹附識

左良玉傳大器無兵不能救

臣方煒按是時大器所

仗惟李輔明馬科二將科已改調關寧輔明又不足
用見綏寇紀略所謂無兵者指此謹附識

左良玉傳良玉得以其間稍復楚境之荊州德安承

天

臣方煒按是時以收復承天陵園為良玉功責

所司補給十六年楚餉缺額四十萬見明紀事本末

謹附識

左良玉傳監軍御史黃澍挾良玉勢面觸馬阮

臣方

煒按澍面糾士英十罪且其常受獻賊偽官周文江
賄因於王前舉笏擊之復連上十疏力攻王不聽諭
澍還見明紀事略謹附識

左良玉傳 郭玘附

已擊殺洵陽也家連戰皆捷

臣

方煒按是時玘與楊世恩屢勝賊於石泉壩康家坪
蚬溪共獲首功六千餘見綏寇紀略所謂連戰皆捷
者指此謹附識

左良玉傳 賀人龍附

其冬張福臻代承疇遣人龍勦賊

臣方煒按是時承疇已平安塞賊譚雄而降賊黨

雄王得貴高陵志等糾賊千餘攻綏德州人龍隨總兵王承恩千總吳國偉追勦斬級二百餘指揮鄧得威以福臻令誘雄等七人斬之見綏寇紀略此所載未晰謹附識

左良玉傳

賀人龍附

守兩月左光先救至圍始解

臣

方煒按是時洪承疇從甘鎮還聞人龍急自平涼遣光先等率師出華亭救之以九月晦日抵隴州賊衆

亦內離園遂解見明紀事本末謹附識

左良玉傳

賀人龍附

都司田應龍等死

臣方煒按是

時與應龍同死者為都司張應春見綏寇紀略謹附

識

左良玉傳

賀人龍附

從巡撫孫傳庭大破賊盤屋禽迎

祥

臣

方煒按是時迎祥陷漢中之石泉由陳倉子

午出將窺西安傳庭破之墊屋之黑水峪生得迎祥

及其領哨黃龍偽總管劉哲三人見明紀事本末謹

附識

左良玉傳

賀人龍附

人龍子大明戰沒

臣方煒按賀

大明

賜祀忠義祠謹識

祖寬傳高迎祥李自成至與獻忠合攻閩鄉寬赴救賊解而趨靈寶斷良玉寬軍不相應

臣方煒按是時

良玉禦之靈寶東寬禦之靈寶西寬以十一月朔入閩鄉城良玉亦棄大營來靈欲與寬合相隔七十里

為賊所斷越四日賊遂陷陝州見綏寇紀略謹附識

附明史卷二百七十三考證後

乾隆四十一年

賜謚諸臣

陶希謙 楊遇春 王 信

以上通謚節愍

越效忠 田應龍 張應春

以上通謚烈愍



總校官編修臣吳紹濬

欽定四庫全書叢要

史部
明史卷二百七十四

詳校官兵部主事臣雷純



欽定四庫全書薈要卷六千八百六十七 史部

明史卷二百七十四

大學士張廷玉等奉 敕修

列傳第一百六十二

史可法

任民育等
何剛等

高弘圖

姜曰廣

周

鏞

雷續祚

史可法字憲之大興籍祥符人世錦衣百戶祖應元舉
於鄉官黃平知州有惠政語其子從質曰我家必昌從

質妻尹氏有身夢文天祥入其舍生可法以孝聞舉崇
禎元年進士授西安府推官稍遷戶部主事歷員外郎
郎中八年遷右參議分守池州太平其秋總理侍郎盧
象昇大舉討賊改可法副使分巡安慶池州監江北諸
軍黃梅賊掠宿松潛山太湖將犯安慶可法追擊之潛
山天堂寨明年祖寬破賊滁州賊走河南十二月賊馬
守應合羅汝才李萬慶自鄖陽東下可法馳駐太湖扼
其衝十年正月賊從間道突安慶石牌尋移桐城參將

潘可大擊走賊賊復為廬鳳軍所扼回桐城掠四境知縣

陳爾銘嬰城守可法與可大勦捕賊走廬江犯潛山可法

與左良玉敗之楓香驛賊乃竄潛山太湖山中三月可大

及副將程龍敗歿於宿松賊分其黨搖天動別為一營而

合八營二十餘萬衆分屯桐城之練潭石井陶冲總兵官牟

文綬劉良佐擊敗之挂車河當是時陝寇聚漳寧分犯岷

洮秦楚應皖羣盜遍野總理廬象昇既改督宣大代以王家

禎祖寬關外兵亦北歸未幾上復以熊文燦代家禎專撫賊

賊益狂逞盤牙江北南都震驚七月擢可法右僉都御史
巡撫安慶廬州太平池州四府及河南之光州光山固始羅
田湖廣之蘄州廣濟黃梅江西之德化湖口諸縣提督軍
務設額兵萬人賊已東陷和州含山定遠六合犯天長盱
眙趨河南可法奏免被災田租冬部將汪雲鳳敗賊潛山
京軍復連破老回回舒城廬江賊遁入山時監軍僉事湯開
遠善擊賊可法東西馳禦賊稍稍避其鋒十一年夏以平
賊踰期戴罪立功可法短小精悍面黑目爍爍有光廉信

與下均勞苦軍行士不飽不先食未授衣不先禦以故
得士死力連敗賊英山六合順天王乞降十二年夏丁
外艱去服闋起戶部右侍郎兼右僉都御史代朱大典
總督漕運巡撫鳳陽淮安揚州劾罷督糧道三人增設
漕儲道一人大濬南河漕政大釐拜南京兵部尚書參
贊機務因武備久弛奏行更新八事十七年四月朔聞
賊犯闕誓師勤王渡江抵浦口聞北都既陷縞衣發喪
會南都議立君張慎言呂大器姜曰廣等曰福王由崧

神宗孫也倫序當立而有七不可貪淫酗酒不孝虐下
不讀書干預有司也潞王常澐神宗姪也賢明當立移
牒可法可法亦以為然鳳陽總督馬士英潛與阮大鍼
計議主立福王咨可法可法以上不可告之而士英已
與黃得功劉良佐劉澤清高傑發兵送福王至儀真於
是可法等迎王五月朔王謁孝陵奉先殿出居內守備
府羣臣入朝王色赧欲避可法曰王母避宜正受既朝
議戰守可法曰王宜素服郊次發師北征示天下以必

報讐之義王唯唯明日再朝出議監國事張慎言曰國
虛無人可遂即大位可法曰太子存亡未卜倘南來若
何誠意伯劉孔昭曰今日既定誰敢復更可法曰徐之
乃退又明日王監國廷推閣臣衆舉可法高弘圖姜曰
廣孔昭攘臂欲並列衆以本朝無勛臣入閣例過之孔
昭勃然曰即我不可馬士英何不可乃并推士英又議
起廢推鄭三俊劉宗周徐石麒孔昭舉大鍼可法曰先
帝欽定逆案毋復言越二日拜可法禮部尚書兼東閣

大學士與士英弘圖並命可法仍掌兵部事士英仍督師鳳陽乃定京營制如北都故事侍衛及錦衣衛諸軍悉入伍操練錦衣東西兩司房及南北兩鎮撫司官不備設以杜告密安人心當是時士英旦夕冀入相及命下大怒以可法七不可書奏之王而擁兵入覲拜表即行可法遂請督師出鎮淮揚十五日王即位明日可法陛辭加太子太保改兵部尚書武英殿大學士士英即以是日入直議分江北為四鎮東平伯劉澤清轄淮海駐淮

北經理山東一路封高傑興平伯轄徐泗駐泗水經理
開歸一路劉良佐廣昌伯轄鳳壽駐臨淮經理陳杞一
路進靖南伯黃得功為侯轄滁和駐廬州經理光固一
路可法即遣使訪大行帝后梓宮及太子二王所在奉
命祭告鳳泗二陵可法去士英孔昭輩益無所憚孔昭
以慎言舉吳姓譁殿上拔刀逐慎言可法馳疏解孔昭
卒扼牲不用可法祭二陵畢上疏曰陛下踐阼初祇謁
孝陵哭泣盡哀道路感動若躬謁二陵親見鳳泗蒿萊

滿目鷄犬無聲當益悲憤願慎終如始處深宮廣廈則思東北諸陵魂魄之未安享玉食大庖則思東北諸陵麥飯之無展膺圖受籙則念先帝之集木馭朽何以忽遘危亡早朝晏罷則念先帝之克儉克勤何以卒隳大業戰兢惕厲無時怠荒二祖列宗將默佑中興若晏處東南不思遠畧賢奸無辨威斷不靈老成投簪豪傑裹足祖宗怨恫天命潛移東南一隅未可保也王嘉答之得功澤清傑爭欲駐揚州傑先至大殺掠屍橫野城中

恂懼登陴守傑攻之決月澤清亦大掠淮上臨淮不納
良佐軍亦被攻朝命可法往解得功良佐澤清皆聽命
乃詣傑傑素憚可法可法來傑夜掘坎十百埋暴骸旦
日謁可法帳中辭色俱變汗決背可法坦懷待之接偏
裨以溫語傑大喜過望然傑亦自是易可法用己甲士
防衛文檄必取視而後行可法夷然為具疏屯其衆於
瓜洲傑又大喜傑去揚州以安可法乃開府揚州六月
大清兵擊敗賊李自成自成棄京師西走青州諸郡縣

爭殺偽官據城自保可法請頒監國登極二詔慰山東
河北軍民心開禮賢館招四方才智以監紀推官應廷
吉領其事八月出巡淮安閱澤清士馬返揚州請餉為
進取資士英靳不發可法疏趣之因言邇者人才日耗
仕途日淆由名心勝而實意不修議論多而成功少今
事勢更非昔比必專主討賊復讐舍籌兵籌餉無議論
舍治兵治餉無人才有撫搭浮談巧營華要者罰無赦
王優詔答之初可法虞傑跋扈駐得功儀真防之九月

朔得功傑構兵曲在傑賴可法調劑事得解北都降賊
諸臣南還可法言諸臣原籍北土者宜令赴吏兵二部
錄用否則恐絕其南歸之心又言北都之變凡屬臣子
皆有罪在北者應從死豈在南者非人臣即臣可法謬
典南樞臣士英叨任鳳督未能悉東南甲疾趨北援鎮
臣澤清傑以兵力不支折而南走是首應重論者臣等
罪也乃因聖明繼統鉞未加恩榮疊被而獨於在北
諸臣毛舉而絜繩之豈散秩閒曹責反重於南樞鳳督

哉宜摘罪狀顯著者重懲示儆若偽命未汚身被刑辱
可置勿問其逃避北方徘徊而後至者許戴罪討賊赴
臣軍前酌用廷議並從之傑居揚州桀驁甚可法開誠
布公導以君臣大義傑大感悟奉約束十月傑師師北
征可法赴清江浦遣官屯田開封為經畧中原計諸鎮
分汛地自王家營而北至宿遷最衝要可法自任之築
壘緣河南岸十一月四日舟次鶴鎮謀報我

大清兵入宿遷可法進至白洋河令總兵官劉肇基往

援

大清兵還攻邳州肇基復援之相持半月而解時自成
既走陝西猶未滅可法請頒討賊詔書言自三月以來
大讐在目一矢未加昔晉之東也其君臣日圖中原而
僅保江左宋之南也其君臣盡力楚蜀而僅保臨安蓋
偏安者恢復之退步未有志在偏安而遽能自立者也
大變之初黔黎洒泣紳士悲哀猶有朝氣今則兵驕餉
絀文恬武嬉頓成暮氣矣河上之防百未經理人心不

肅威令不行復讐之師不聞及關陝討賊之詔不聞達
燕齊君父之讐置諸膜外夫我即卑宮菲食嘗膽卧薪
聚才智精神枕戈待旦合方州物力破釜沉舟尚虞無
救以臣觀廟堂謀畫百執事經營殊未盡然夫將所以
能克敵者氣也君所以能禦將者志也廟堂志不奮則
行間氣不鼓夏少康不忘出竇之辱漢光武不忘蕪薪
之時臣願陛下為少康光武不願左右在位僅以晉元
宋高之說進也先皇帝死於賊恭皇帝亦死於賊此千

古未有之痛也在北諸臣死節者無多在南諸臣討賊者復少此千古未有之恥也庶民之家父兄被殺尚思穴胸斷脛得而甘心況在朝廷顧可漠置臣願陛下速發討賊之詔責臣與諸鎮悉簡精銳直指秦關縣上爵以待有功假便宜而責成效絲綸之布痛切淋漓庶海內忠臣義士聞而感憤也國家邁此大變陛下嗣登大寶與先朝不同諸臣但有罪之當誅曾無功之足錄今恩外加恩未已武臣腰玉名器濫觴自後宜慎重務以

爵祿待有功庶猛將武夫有所激厲兵行最苦無糧搜括既不可行勸輸亦難為繼請將不急之工程可已之繁費朝夕之燕衍左右之進獻一切報罷即事闕典禮亦宜槩從節省蓋賊一日未滅即有深宮曲房錦衣玉食豈能安享必刻刻在復讐雪恥振舉朝之精神萃萬方之物力盡并於選將練兵庶人心可鼓天意可回可法每繕疏循環諷誦聲淚俱下聞者無不感泣先是我睿親王多爾袞遺可法書責以大義可法復書辨論

大清兵遂南征下邳宿可法飛章報士英曰渠欲叙防河將士功耳慢弗省諸鎮亦數相攻無進師意明年為

大清順治之二年正月餉缺諸軍皆饑頃之河上告警詔良佐得功率師扼潁壽傑進兵歸徐傑至睢州為許定國所殺部下兵大亂屠睢旁近二百里殆盡變聞可法流涕頓足歎曰中原不可為矣遂如徐州以總兵李本身為提督統傑兵本身者傑甥也以胡茂順為督師中軍李成棟為徐州總兵諸將各分地又立傑子元爵

為世子請卹於朝軍乃定傑軍既還於是大梁以南皆
不守士英忌可法威名加故中允衛允文兵部右侍郎
總督興平軍以奪可法權允文傑同鄉也陷賊南還傑
請為己監軍傑死允文承士英旨疏誚可法士英喜故
有是命駐揚州二月可法還揚州未至得功來襲興平
軍城中大懼可法遣官講解乃引去時大兵已取山東
河南北逼淮南四月朔可法移軍駐泗州護祖陵將行
左良玉稱兵犯闕召可法入援渡江抵燕子磯得功已

敗良玉軍可法乃趨天長檄諸將救盱眙俄報盱眙已降

大清泗州援將侯方嚴全軍沒可法一日夜奔還揚州訛傳定國兵將至殲高氏部曲城中人悉斬關出舟楫一空可法檄各鎮兵無一至者二十日

大清兵大至屯班竹園明日總兵李棲鳳監軍副使高岐鳳拔營出降城中勢益單諸文武分陴拒守舊城西門險要可法自守之作書寄母妻且曰死葬我高皇帝

陵側越二日

大清兵薄城下礮擊城西北隅城遂破可法自刎不殊
一參將擁可法出小東門遂被執可法大呼曰我史督
師也遂殺之揚州知府任民育同知曲從直王纘爵江
都知縣周志畏羅伏龍兩淮鹽運使楊振熙監餉知縣
吳道正江都縣丞王志端賞功副將汪思誠幕客盧渭
等皆死可法初以定策功加少保兼太子太保以太后
至加少傅兼太子太傅敘江北戰功加少師兼太子太

師禽劇盜程繼孔功加太傅皆力辭不允後以宮殿成
加太師力辭乃允可法為督師行不張蓋食不重味夏
不簾冬不裘寢不解衣年四十餘無子其妻欲置妾太
息曰王事方殷敢為兒女計乎歲除遣文牒至夜半倦
索酒庖人報殺肉已分給將士無可佐者乃取鹽豉下
之可法素善飲數斗不亂在軍中絕飲是夕進數十觥
思先帝泣然淚下凭几卧比明將士集轅門外門不啓
左右遙語其故知府民育曰相公此夕卧不易得也命

鼓人仍擊四鼓戒左右毋驚相公須臾可法寤聞鼓聲大怒曰誰犯吾令將士述民育意乃獲免嘗子處鈴閣或舟中有言宜警備者曰命在天可法死覓其遺骸天暑衆屍蒸變不可辨識踰年家人舉袍笏招魂葬於揚州郭外之梅花嶺其後四方弄兵者多假其名號以行故時謂可法不死云可法無子遺命以副將史德威為之後有弟可程崇禎十六年進士擢庶吉士京師陷降賊賊敗南歸可法請置之理王以可法故令養母可程

遂居南京後流寓宜興閱四十年而卒任民育字時澤
濟寧人天啟中鄉舉善騎射真定巡撫徐標請於朝用
為贊畫理屯事真定失南還福王時授亳州知州以才
擢揚州知府可法倚之城破緋衣端坐堂上遂見殺闔
家男婦盡赴井死徙直遼東人與其子死東門纘爵鄆
人工部尚書佐孫志畏亦鄆人進士年少好氣數遭倖
將士窘辱求解職會伏龍至可法命代之伏龍新喻人
故梓潼知縣受代甫三日振熙臨海人道正餘姚人志

端孝豐人思誠字純一貴池人渭字渭生長洲諸生可
法出鎮淮揚渭等伏闕上書言秦檜在內李綱居外宋
終北轅不納居禮賢館久可法才渭渭方歲貢當得官
不受職而擬授崑山歸昭等二十餘人為通判推官知
縣甫二旬城陷渭監守鈔關投於河昭死西門從死者
十七人時同守城死者又有遵義知府何剛庶吉士吳
爾璵而揚州諸生殉義者有高孝纘王士琇王纘王績
王績等又有武生戴之藩醫者陳天拔畫士陸愉義兵

張有德市民馮應昌舟子徐某並自盡他婦女死節者
不可勝紀何剛字慤人上海人崇禎三年舉於鄉見海
內大亂慨然有濟世之志交天下豪俊與東陽許都善
語之曰子所居天下精兵處盍練一旅以待用都諾而
去十七年正月入都上書言國家設制科立資格以約
束天下豪傑此所以弭亂非所以戡亂也今日救生民
匡君國莫急於治兵陛下誠簡強壯英敏之士命知兵
大臣教習之講韜鈴練筋骨拓膽智時召而試之學成

優其秩寄以兵柄必能建奇功臣讀戚繼光書繼光數言義烏東陽兵可用誠得召募數千加之訓練準繼光遺法分布河南郡縣大寇可平因薦都及錢塘進士姚奇允桐城諸生周岐陝西諸生劉湘客絳州舉人韓霖帝壯其言即擢剛職方主事募兵金華而都作亂已前死霖亦為賊用剛不知故並薦之剛出都都城陷馳還南京先是賊逼京師剛友陳子龍夏允彝將聯海舟達天津備緩急募卒二千人至是令剛統之子龍入為兵

科言防江莫如水師更乞廣行召募委剛訓練從之剛乃上疏言臣請陛下三年之內宮室不必修百官禮樂不必備惟日求天下才智者決策廉者理財勇者禦敵爵賞無出此三者則國富兵強大難可服若以驕悍之將馭無制之兵空言恢復是却行而求前也優游歲月潤色偏安錮豪傑於草間迫梟雄為盜賊是株守以待盡也惟廟堂不以浮文取士而以實績課人則真才皆為國用而議論亦省矣分遣使者羅草澤英豪得才多

者受上賞則臬傑皆畢命封疆而盜魁亦少矣東南人滿徙之江北或賜爵或贖罪則豪右皆盡力南畝而軍餉亦充矣時不能用尋進本司員外郎以其兵隸史可法可法大喜得剛剛亦自喜遇可法知己士英惡之出剛遵義知府可法垂涕曰子去吾誰仗剛亦泣願死生無相背踰月揚州被圍佐可法拒守城破投井死吳爾璵崇德人崇禎十六年進士授庶吉士賊敗南還謁可法請從軍贖罪可法遂留參軍事其父之屏方督學福

建爾壘斷一指畀故人祝淵曰君歸語我父母悉出私財畀我餉軍我他日不歸以指葬可也從高傑北征至睢州傑被難爾壘流寓祥符遇一婦人自言福王妃爾壘因守臣附疏以進詔斥其妄言逮之可法為救免後守揚州新城投井死

高弘圖字研文膠州人萬厯三十八年進士授中書舍人擢御史孤棱自持不依麗人天啓初陳時政八患請用鄒元標趙南星巡按陝西題薦屬吏趙南星糾之弘

圖不能無望代還移疾去魏忠賢亟攻東林其黨以弘
圖嘗與南星有隙召起弘圖故官入都則楊漣左光斗
魏大中等已下詔獄鍛鍊嚴酷弘圖果疏論南星然言
國是已明雷霆不宜頻擊詔獄諸臣生殺宜聽司敗法
則頗謂忠賢過當者疏中又引漢元帝乘船事忠賢方
導帝遊幸不悅矯旨切責之後諫帝毋出蹕東郊又極
論前陝西巡撫喬應甲罪又嘗語刺崔呈秀呈秀應甲
皆忠賢黨由是忠賢大怒擬順天巡按不用弘圖乞歸

遂令閒住莊烈帝即位起故官劾罪田詔劉志選梁夢
環擢太僕少卿復移疾去三年春召拜左僉都御史進
左副都御史五年遷工部右侍郎方入署總理戶工二
部中官張彝憲來會弘圖恥之不與共坐七疏乞休帝
怒遂削籍歸家居十年不起十六年召拜南京兵部右
侍郎就遷戶部尚書明年三月京師陷福王立改弘圖
禮部尚書兼東閣大學士疏陳新政八事一宣義問請
聲逆賊之罪鼓發忠義一勤聖學請不俟釋服日御講

筵一設記注請召詞臣入侍日記言動一睦親藩請如
先朝踐極故事遣官齎璽書慰問一議廟祀請權附列
聖神主於奉先殿仍於孝陵側望祀列聖山陵一嚴章
奏請禁奸宄小人借端妄言脫罪僥倖一收人心請蠲
江北河南山東田租毋使賊徒藉口一擇詔使請遣官
招諭朝鮮示牽制之勢並褒納焉當是時朝廷大議多
出弘圖手馬士英疏薦阮大鍼弘圖不可士英曰我自
任之乃命大鍼假冠帶陞見大鍼入見歷陳寃狀以弘

圖不附東林引為證弘圖則力言逆案不可翻大鍼士
英並怒一日閣中語及故庶吉士張溥士英曰我故人
也死酹而哭之姜曰廣笑曰公笑東林者亦東林耶士
英曰我非畔東林者東林拒我耳弘圖因縱與之士英
意解而劉宗周劾疏自外至大鍼宣言曰廣實使之於
是士英怒不可止而薦張捷謝陞之疏出朝端益水火
矣內札用戶部侍郎張有譽為尚書弘圖封還具奏力
諫卒以廷推簡用中官議設東廠弘圖爭不得遂乞休

不許加太子少師改戶部尚書文淵閣尋以太后至進
太子太保其年十月弘圖四疏乞休乃許之弘圖既謝
政無家可歸流寓會稽國破逃野寺中絕粒而卒

姜曰廣字居之新建人萬厯末舉進士授庶吉士進編
修天啓六年奉使朝鮮不攜中國一物往不取朝鮮一
錢歸朝鮮人為立懷潔之碑明年夏魏忠賢黨以曰廣
東林削其籍崇禎初起右中允九年積官至吏部右侍
郎坐事左遷南京太常卿遂引疾去十五年起詹事掌

南京翰林院莊烈帝嘗言曰廣在講筵言詞激切朕知其人每優容之北都變聞諸大臣議所立曰廣呂大器用周鑣雷縯祚言主立潞王而諸帥奉福藩至江上於是文武官並集內官宅韓贊周令各署名籍曰廣曰無息遽請祭告奉先殿而後行明日至奉先殿諸勲臣語侵史可法曰廣呵之於是羣小咸目攝曰廣廷推閣臣以曰廣異議不用用史可法高弘圖馬士英及再推詞臣以王鐸陳子莊黃道周名上而首曰廣乃改曰廣禮

部尚書兼東閣大學士與鐸並命鐸未至可法督師揚州曰廣與弘圖協心輔政而士英挾擁戴功內結勛臣朱國弼劉孔昭趙之龍外連諸鎮劉澤清劉良佐等謀擅朝權深忌曰廣未幾士英特薦起阮大鍼曰廣力爭不得遂乞休言前見文武交競既慙無術調和近睹逆案忽翻又愧不能寢弭遂棄先帝十七年之定力反陛下數日前之明詔臣請以前事言之臣觀先帝之善政雖多而以堅持逆案為尤美先帝之害政間有而以頻

出口宣為亂階用閣臣內傳矣用部臣勲臣內傳矣用
大將用言官內傳矣而所得閣臣則淫貪巧猾之周延
儒也逢君股民奸險刻毒之溫體仁楊嗣昌也偷生從
賊之魏藻德也所得部臣則陰邪貪狡之王永光陳新
甲所得勲臣則力阻南遷盡撤守禦狂穉之李國楨所
得大將則紂綉支離之王樸倪寵所得言官則貪橫無
賴之史堃陳啓新也凡此皆力排衆議簡自中旨後效
可睹今又不然不必僉同但求面對立談取官陰奪會

推之柄陽避中旨之名決廉恥之大防長便佞之惡習
此豈可訓哉臣待罪綸扉苟好盡言終蹈不測之禍聊
取充位又來鮮恥之譏願乞骸骨還鄉里得旨慰留士
英大鍼等滋不悅國弼孔昭遂以誹謗先帝誣讎忠臣
李國楨為言交章攻之劉澤清故附東林擁立議起亦
主潞王至是入朝則力詆東林以自解免且曰中興所
恃在政府今用輔臣宜令大帥僉議曰廣愕然越數日
澤清疏劾呂大器雷縯祚而薦張捷鄒之麟張孫振劉

光斗等已又請免故輔周延儒賊曰廣曰是欲漸干朝政也乃下部議竟不許曰廣嘗與士英交詆王前宗室朱統鑣者素無行士英啖以官使擊曰廣澤清又假諸鎮疏攻劉宗周及曰廣以三案舊事及迎立異議為言請執下法司正謀危君父之罪頃之統鑣復劾曰廣五大罪請并劉士楨王重楊廷麟劉宗周陳必謙周鑣雷縝祚置之理必謙鑣以是逮曰廣既連遭誣讎屢疏乞休其年九月始得請入辭諸大臣在列曰廣曰微臣觸

忤權奸自分萬死上恩寬大猶許歸田臣歸後願陛下
以國事為重士英熟視曰廣詈曰我權奸汝且老而賊
也既出復於朝堂相詬詈而罷曰廣骨鯁扼於儉邪不
竟其用遂歸其後左良玉部將金聲桓者已降於我
大清既而返江西迎曰廣以資號召聲桓敗曰廣投僉
家池死周鑣字仲馭金壇人父秦峙雲南布政使鑣舉
鄉試第一崇禎元年成進士授南京戶部主事權稅蕪
湖憂歸服闋授南京禮部主事極論內臣言官二事言

張彞憲用而高弘圖金鉉罷王坤用而魏呈潤趙東曦

斥鄧希詔用而曹文衡罷間王弘祖李曰輔熊開元罹

罪每讀邸報半屬內侍溫綸自今鍛鍊臣子委褻天言

祇徇中貴之心臣不知何所極也言官言出禍隨黃道

周諸臣薦賢不效而惠世揚劉宗周弗獲進華允誠諸

臣驅奸無濟而陳于廷姚希孟鄭三俊皆蒙譴每奉嚴

諭率皆直臣封章自今播棄忠良獎成宵小祇快奸人

之計臣益不知何所極矣帝怒斥為民鑣由是名聞天

下初鑣世父尚書應秋叔父御史維持以附魏忠賢竝
麗逆案鑣恥之通籍後即交東林矯矯樹名節及被放
與宣城沈壽民讀書茅山廷臣多論薦之十五年起禮
部主事進郎中為吏部尚書鄭三俊所倚然為人好名
頗飾偽給事中韓如愈疏論之罷歸福王立於南京馬
士英既逐呂大器以鑣及雷縯祚曾主立潞王議令朱
統鑣劾曰廣因言鑣縯祚等皆曰廣私黨請悉置於理
遂令逮治而士英劾鑣從弟鍾從逆并及鑣鍾亦逮治

阮大鍼居金陵時諸生顧杲等出留都防亂公揭討之
主之者鑣也大鍼以故恨鑣鑣獄急屬御史陳丹衷求
解於士英為緝事者所獲丹衷出為長沙知府於是察
處御史羅萬爵希大鍼指上疏痛詆鑣而光祿卿祁逢
吉鑣同邑人見人輒詈鑣遂得為戶部侍郎亡何左良
玉稱兵檄討士英罪言引用大鍼構陷鑣續祚鍛鍊周
內士英大鍼益怒大鍼謂鑣實召良玉兵王乃賜鑣續
祚自盡鍾棄市雷續祚太湖人崇禎三年舉於鄉十三

年夏帝思破格用人而考選止及進士特命舉人貢生就試教職者悉用為部寺司屬推官知縣凡二百六十人號為庚辰特用而續祚得刑部主事明年三月劾楊嗣昌六大罪可斬鳳陽總督朱大典安慶巡撫鄭二陽河南巡撫高名衡山東巡撫王公弼宜急易帝不悅十五年擢武德道兵備僉事山東被兵續祚守德州有詔獎勵乃疏劾督師范志完縱兵淫掠折除軍餉構結大黨帝心善其言以淫掠事責兵部而令續祚再陳志

完者首輔周延儒門生也續祚意有所忌久不奏明年五月延儒下廷議續祚乃奏言志完兩載僉事驟陟督師非有大黨何以至是大僚則尚書范景文等詞林則諭德方拱乾等言路則給事中朱徽沈允培袁彭年等皆其黨也方德州被攻不克去畧臨清又五日志完始至聞後部破景州則大懼欲避入德州城漏三下邀臣議臣不聽志完乃偕流寓詞臣拱乾見臣南城古廟臣告以督師非入城官薊州失事由降丁內潰志完不懌

而去若夫座主當朝罔利曲庇隻手有燎原之勢片語操生死之權稱功頌德徧於班聯臣不忍見陛下以周召待大臣而大臣以嚴嵩薛國觀自待也臣外藩小吏乙榜孤蹤不言不敢盡言不敢感陛下虛懷俯納故不避首輔延儒與舉國媚附時局畧進一言至中樞主計請餉必餽常例天下共知他乾沒更無算疏入帝益心動命議舊計臣李待問傅淑訓樞臣張國維及戶科荆永祚兵科沈迅張嘉言罪而召續祚陞見越數日抵京

又數日入對召志完拱乾質前疏中語拱乾為志完辨
帝頷之問續祚稱功頌德者誰對曰延儒招權納賄如
起廢清獄蠲租皆自居為功考選臺諫盡收門下凡求
總兵巡撫者必先賄幕客董廷獻帝怒逮廷獻誅志完
而令續祚還任續祚尋以憂去福王時統鎮劾曰廣因
及之遂逮治明年四月與鑣同賜自盡故事小臣無賜
自盡者因良王兵東下故大鉞輩急殺之

贊曰史可法憫國步多艱忠義奮發提兵江潯以當南

北之衝四鎮綦布聯絡聲援力圖興復然而天方降割
權臣掣肘於內悍將跋扈於外遂致兵頓餉竭疆圉日
蹙孤城不保志決身殲亦可悲矣高弘圖姜曰廣皆蘊
忠謀協心戮力而扼於權奸不安其位蓋明祚傾移固
非區區一二人之所能挽也

明史卷二百七十四

欽定四庫全書

明史卷二百七十四考證

史可法傳總兵官牟文綬劉良佐擊敗之挂車河

臣

方煒按文綬是時本協守鳳陵緣舒城急淮撫邀之
援舒桐城非淮撫分地而於舒為唇齒按臣張煊請
救於文綬乃以閏四月偕良佐率馬步九千人至桐
城勝之仍以舒警行而分二千人戍桐城見明紀事
本末謹附識

史可法傳代朱大典總督漕運

臣方煒按可法督漕

時廷議將易兵部尚書陳新甲於是尚書劉遵憲言
官章正宸等十一人並舉可法章下吏部尚書李日
宣等言可法文武才而漕事方亟宜俟報竣召用乃
復留見孫承澤春明夢餘錄謹附識

史可法傳奏行更新八事

臣方煒按所奏八事明紀

事本末諸書皆無考謹識

史可法傳朝命可法往解得功良佐澤清皆聽命

臣

方煒按是時監軍太僕寺少卿萬元吉詣諸將營往來開諭乃解見元吉本傳謹附識

史可法傳十月傑帥師北征

臣方煒按是年七月傑

發總兵李朝雲越泗州防守叅將蔣應雄許占魁郭茂榮李玉赴徐州防守十月傑自提兵直趨歸開見明紀事本末謹附識

史可法傳加故中允衛允文兵部右侍郎

臣方煒按

中允衛允文士英本傳作侍講互異未知孰是謹附

考

史可法傳允文傑同鄉也陷賊南還傑請為已監軍

臣方煒按允文傑監軍時已以原官兼兵科給事中
見傑本傳謹附識

史可法傳得功已敗良玉兵 臣方煒按是時以敗良

玉功封得功靖國公見綏寇紀略謹附識

史可法傳可法大呼曰我史督師也遂殺之 臣方煒

按史可法及侯方巖任民育曲從直王纘爵周志畏

羅伏龍楊振熙吳道正王志端汪思誠何剛

賜謚俱另開卷末謹識

史可法傳家人舉袍笏招魂葬於揚州郭外之梅花嶺

臣方煒按謹按乾隆四十年蒙

賜修可法祠墓並

其遺像刻石祠中表中曠典誠自古所未有也謹識於
此

史可法傳可法才渭渭方歲貢當得官不受職而擬

授崑山歸昭等二十餘人為通判推官知縣甫二旬
城陷渭監軍鈔關投於河昭死西門從死者十七人
時同守城死者又有遵義知府何剛庶吉士吳爾璵
而揚州諸生殉義者有高孝鑽王士秀王鑽王績王
績等又有武生戴之藩醫者陳天拔畫士陸愉義兵
張有德等市民應昌舟子徐某並自盡

臣方煒

按盧渭歸昭及高孝鑽王士秀王鑽王績王績戴之
藩陳天拔陸愉張有德馮應昌舟子徐某均

賜祀忠義祠謹識

高弘圖傳擢御史

臣方煒按弘圖為御史時嘗與同

官張慎言文章請寬賈繼春忤旨將重譴譴尚書周
嘉謨大學士劉一璟力救乃奪俸二年見明實錄謹
附識

高弘圖傳遂削籍歸家

臣方煒按弘圖之削籍而歸

也在六年三月見明紀事本末謹附識

高弘圖傳馬士英疏薦阮大鍼弘圖不可

臣方煒按

士英薦起大鉞時吏部侍郎呂大器懷遠侯常延齡
太僕寺少卿萬元吉御史陳良弼詹兆恒郭維經王
孫蕃左光先兵部郎中尹民興等各疏所見不聽見明
紀事本末謹附識

高弘圖傳其年十月弘圖四疏乞休

臣方煒按是時

弘圖並請召還史可法不許見明紀事本末謹附識
姜曰廣傳曰廣嘗與士英交詆王前

臣方煒按是時

議設廠衛緝事官蘇松巡撫祁彪佳力諫曰廣為擬

俞旨不從疏爭之甚力乃命五城御史察訪見明紀
事本末謹附識

姜曰廣傳統鑰復劾曰廣五大罪

臣方煒按統鑰所

劾曰廣五大罪一引用東林鄭三俊吳甡房可壯孫
晉把持朝政以劉士楨為通政過章奏以王重為文
選植私人二篡逆令楊廷麟出劇盜南康獄交聯奸
俠日窺南都聲息將有劫遷別戴之謀三庇從賊諸
臣四納賄五奸媳給事中熊汝霖總督衣繼咸皆不

平抗疏論列不報見明紀事本末謹附識

姜曰廣傳曰廣投僂家池死

臣方煒按姜曰廣

賜謚另載卷末謹識

姜曰廣傳

周鏐附

士英劾鏐從弟鍾從逆并及鏐

臣

方煒按鍾崇禎十五年授庶吉士降於自成用為檢
討賊敗南歸或傳其勸進時有比堯舜而多武功邁
湯武而無慚德語又進急下江南策士英遂劾其罪
並言鏐及鍾胞弟前蕭山令銓鈞當從坐遂被逮見

明紀事本末謹附識

姜曰廣傳

周鑣附

大鉞謂鑣實召良玉兵

臣方煒按

鑣友人桐城左國棟蕪湖沈士柱皆嘗列名防亂公
揭避大鉞客良玉所故大鉞謂鑣召良玉兵見綏寇
紀略謹附識

姜曰廣傳

雷縉祚附

劾楊嗣昌六大罪可斬

臣方煒

按縉祚所劾嗣昌六大罪明紀事本末諸書皆無可

考謹識

姜曰廣傳

雷續祚附

福王時統鑰劾曰廣因及之遂逮

治

臣方煒按甲申五月議立福王時曰廣謂續祚

其門人言福王不可立當設法阻之至是統鑰劾及
之大鉞復據以入告言續祚當時欲設何法可為寒
心請立正典刑明年二月給事中林有本劾續祚不
孝不忠四月遂賜死見明紀事本末謹附識

附明史卷二百七十四考証後

乾隆四十一年

賜謚諸臣

史可法 專謚忠正

高弘圖 專謚忠貞

姜曰廣 專謚忠確

任民育 何剛

以上通謚忠節

曲從直 周志畏

以上通諡烈愍

侯方巖 王纘爵 羅伏龍 楊振熙 吳道正

王志端 汪思誠

以上通諡節愍